

摘藻堂四庫全書薈要

史部

欽定四庫全書薈要卷七千九十一

史部

資治通鑑卷一百五

宋 司馬光 撰

胡三省 音註

晉紀二十七

起昭陽協洽盡閏逢涸灘凡二年

烈宗孝武皇帝上之下

太元八年春正月秦呂光發長安以鄯善王休密馱車

師前部王彌寔為鄉導

鄯上扇翻馱唐何翻寔徒賢翻又唐見翻鄉讀曰嚮

三

月丁巳大赦

夏五月桓冲帥眾十萬伐秦攻襄陽

帥讀

遣前將軍劉波等攻沔北諸城

沔彌充翻

輔國將軍楊亮

攻蜀拔五城進攻涪城

涪音浮

鷹揚將軍郭銓攻武當六

月冲別將攻萬歲筑陽拔之

萬歲城名蓋近筑陽筑陽縣漢屬南陽郡晉屬順陽

郡春秋穀伯之國唐為襄州穀城縣師古曰筑音逐

秦王堅遣征南將軍鉅鹿公

叡冠軍將軍慕容垂等帥步騎五萬救襄陽

冠古玩翻奇寄翻

兖州刺史張崇救武當後將軍張蚝步兵校尉姚萇救

涪城

蚝七吏翻萇仲良翻

叡軍於新野垂軍於鄧城

鄧城縣屬襄陽郡蓋晉置

也桓冲退屯沔南秋七月郭銓及冠軍將軍桓石虔敗

張崇于武當

敗補邁翻

掠二千戶以歸鉅鹿公獻遣慕容垂

為前鋒進臨沔水垂夜命軍士人持十炬繫於樹枝光

照數十里冲懼退還上明

冲鎮上明見上卷二年

張蚝出斜谷

斜余

遮翻谷音浴又古祿翻

楊亮引兵還冲表其兄子石民領襄城太

守戍夏口冲自求領江州刺史詔許之秦王堅下詔

大舉入寇民每十丁遣一兵其良家子年二十已下有

材勇者皆拜羽林郎又曰其以司馬昌明為尚書左僕

射謝安為吏部尚書桓冲為侍中勢還不遠

謂以勢言之克晉之

期近在旦夕還師不遠也還音旋又如字

可先為起第

為于偽翻

良家子至者三

萬餘騎

騎奇寄翻下同

拜秦州主簿趙盛之為少年都統

都統官名

起于此少詩

是時朝臣皆不欲堅行

朝直遂翻

獨慕容垂姚

萇及良家子勸之陽平公融言于堅曰鮮卑羌虜我之

仇讐

慕容垂鮮卑也姚萇羌也其國皆為秦所滅雖曰臣服其實仇讐

常思風塵之變

以逞其志所陳策畫何可從也良家少年皆富饒子弟

不閑軍旅苟為諂諛之言以會陛下之意

會會合也

今陛下

信而用之輕舉大事臣恐功既不成仍有後患悔無及

也堅不聽八月戊午堅遣陽平公融督張蚝慕容垂等

步騎二十五萬為前鋒以兗州刺史姚萇為龍驤將軍

督益梁州諸軍事堅謂萇曰昔朕以龍驤建業

堅以龍驤將軍

殺苻生得秦國驤思將翻

未嘗輕以授人卿其勉之左將軍竇衝曰

王者無戲言此不祥之徵也堅默然慕容楷慕容紹言

於慕容垂曰主上驕矜已甚叔父建中興之業在此行

也垂曰然非汝誰與成之

至此垂知堅必敗方與兄子明言之

甲子堅發

長安戎卒六十餘萬騎二十七萬旗鼓相望前後千里

九月堅至項城涼州之兵始達咸陽蜀漢之兵方順流

而下幽冀之兵至於彭城東西萬里水陸齊進運漕萬

艘

艘蘇遭翻

陽平公融等兵三十萬先至潁口

潁水入淮之口也地理志

潁水出陽城縣陽乾山東下至蔡入淮

詔以尚書僕射謝石為征虜將軍

征討大都督以徐兗二州刺史謝玄為前鋒都督與輔

國將軍謝琰西中郎將桓伊等衆共八萬拒之使龍驤

將軍胡彬以水軍五千援壽陽琰安之子也是時秦兵

既盛都下震恐謝玄入問計於謝安安夷然

夷坦也平也言坦然

無異平  
日也

答曰已別有旨既而寂然玄不敢復言乃令張

玄重請

復扶又翻  
重直用翻

安遂命駕出遊山墅

墅承與翻  
園廬也

親朋

畢集與玄圍碁賭墅安碁常劣於玄是日玄懼便為敵

手而又不勝

敵手謂下子爭行却智算相敵也玄意不在碁故不能勝安

安遂游陟

至夜乃還

還從宣翻  
又如字

桓冲深以根本為憂遣精銳三千

入衛京師謝安固却之曰朝廷處分已定

處昌呂翻  
分扶問翻

兵

甲無闕西藩宜留以為防冲對佐吏歎曰

諸藩府參  
佐為佐吏謝

安石有廟堂之量不閑將畧

將即亮翻

今大敵垂至方遊談

不暇遣諸不經事少年拒之衆又寡弱天下事已可知

吾其左社矣 以琅邪王道子錄尚書六條事

錄尚書六條事

始於劉聰

冬十月秦陽平公融等攻壽陽癸酉克之執平

虜將軍徐元喜等融以其參軍河南郭褒為淮南太守

淮南郡本治壽陽秦既得之以郭褒為太守

慕容垂拔郢城

杜預曰江夏雲杜縣東南有郢

城郢于

胡彬聞壽陽陷退保硖石

水經注淮水東過壽春縣北右合肥水又

北逕山夾中謂之硖石對岸山上結二城以防津要杜佑曰硖石今六安陰郡下蔡縣

融進攻之秦

衛將軍梁成等帥衆五萬屯于洛澗柵淮以遏東兵

水經

注洛澗上承苑馬塘水北歷秦墟  
下注淮謂之洛口帥讀曰率下同

謝石謝玄等去洛澗

二十五里而軍憚成不敢進胡彬糧盡潛遣使告石等

曰今賊盛糧盡恐不復見大軍

復扶又翻

秦人獲之送於陽

平公融融馳使白秦王堅曰賊少易擒但恐逃去宜速

赴之

使疏吏翻下同融持議以為晉不可伐今臨敵乃輕脫如此亦天奪其鑒也少許洛翻易以鼓翻

堅乃留大軍於項城引輕騎八千兼道就融於壽陽遣

尚書朱序來說謝石等以為彊弱異勢不如速降

三年堅執

朱序于襄陽拜為度支尚  
書說輸芮翻降戶江翻

序私謂石等曰若秦百萬之

衆盡至誠難與為敵今乘諸軍未集宜速擊之若敗其

前鋒

敗補  
邁翻

則彼已奪氣可遂破也石聞堅在壽陽甚懼

欲不戰以老秦師謝琰勸石從序言十一月謝玄遣廣

陵相劉牢之帥精兵五千趣洛澗

趣七  
喻翻

未至十里梁成

阻澗為陳以待之

陳讀曰  
陣下同

牢之直前渡水擊成大破之

斬成及弋陽太守王詠

曹魏分西陽斬春置弋陽郡秦  
未能有其地也王詠領太守耳

弋陽唐為光  
黃三州之地

又分兵斷其歸津

斷丁  
管翻

秦步騎崩潰爭

赴淮水士卒死者萬五千人執秦揚州刺史王顯等盡

收其器械軍實于是謝石等諸軍水陸繼進秦王堅與

陽平公融登壽陽城望之見晉兵部陣嚴整又望八公

山上草木皆以為晉兵

八公山在今壽春縣北四里世傳漢淮南王安好神仙忽有八

公皆鬚眉皓素詣門求見門者曰吾主好長生今先生無駐衰之術未敢以聞八公皆變成童遂立廟于山上

或言今廟食于此山者乃右吳朱驕任被雲被雪八人皆淮南王之客世以八公為仙誕也

顧謂融

曰此亦勍敵何謂弱也

勍渠京翻強也

憚然始有懼色

憚周甫翻悵然

貌失意

秦兵逼肥水而陳晉兵不得渡謝玄遣使謂陽平

公融曰君懸軍深入而置陳逼水此乃持久之計非欲

速戰者也若移陳少却

少詩治翻下同

使晉兵得渡以決勝負

不亦善乎秦諸將皆曰我衆彼寡不如遏之使不得上

上時掌翻

可以萬全堅曰但引兵少却使之半渡我以鐵騎

蹙而殺之蔑不勝矣融亦以為然遂麾兵使却秦兵遂

退不可復止

兩陳相向退者先敗此用兵之常勢也復扶又翻

謝玄謝琰桓伊

等引兵渡水擊之融馳騎畧陳欲以帥退者

帥讀日率

馬倒

為晉兵所殺秦兵遂潰玄等乘勝追擊至于青岡

青岡去今

壽春縣三十里

秦兵大敗自相蹈藉而死者蔽野塞川

言敗兵自相蹈

踐枕藉而死也藉  
慈夜翻塞悉則翻

其走者聞風聲鶴唳皆以為晉兵且

至晝夜不敢息草行露宿

草行者涉草而行不敢由路  
露宿者宿于野次不敢入人

家皆懼  
追兵也

重以飢凍

重直  
用翻

死者什七八初秦兵少却朱序

在陳後呼曰

呼火  
故翻

秦兵敗矣衆遂大奔序因與張天錫

徐元喜皆來奔獲秦王堅所乘雲母車

晉制雲母車以  
雲母飾犢車臣

下不得乘以賜王公耳趙彥綰續古今注石  
虎皇后乘輦以純雲母代紗四望皆通徹

復取壽陽

執其淮南太守郭褒

晉復取壽陽故秦  
所置太守見執

堅中流矢

中竹  
仲翻

單騎走至淮北飢甚民有進壺殭豚髀者

殭蘇昆翻熟  
食曰殭字林

曰水澆飯也

堅食之賜帛十匹綿十斤辭曰陛下厭苦安樂

樂音洛

自取危困臣為陛下子陛下為臣父安有子飼其

父而求報乎弗顧而去

飼祥吏翻

堅謂張夫人曰吾今復何

面目治天下乎

復扶又翻治直之翻

潛然流涕

潛所姦翻流涕貌又所版翻所晏翻

是時諸軍皆潰惟慕容垂所將三萬人獨全

垂別擊鄖城不與肥

水之戰且持軍嚴整故諸軍皆潰而垂軍獨全將即亮翻

堅以千餘騎赴之世子寶

言於垂曰家國傾覆天命人心皆歸至尊但時運未至

故晦迹自藏耳今秦主兵敗委身于我是天借之便以

復燕祚此時不可失也願不以意氣微恩忘社稷之重

意氣微恩謂堅厚禮垂父子也

垂曰汝言是也然彼以赤心投命於我

若之何害之天苟棄之不患不亡不若保護其危以報

德徐俟其釁而圖之既不負宿心且可以義取天下

慕容

垂此言猶有君人之度

奮威將軍慕容德曰秦彊而并燕秦弱而

圖之此為報仇雪恥非負宿心也兄奈何得而不取釋

數萬之衆以授人乎垂曰我昔為太傅所不容置身無

所逃死于秦

見一百二卷海西公太和四年

秦主以國士遇我恩禮備

至後復為王猛所賣

復扶又翻下尚復德復同

無以自明秦主獨能

明之

見太和五年

此恩何可忘也若氏運必窮吾當懷集關

東以復先業耳關西會非吾有也冠軍行參軍趙秋曰

明公當紹復燕祚著於圖讖

冠古玩翻讖楚諧翻

今天時已至尚

復何待若殺秦主據鄴都鼓行而西三秦亦非苻氏之

有也垂親黨多勸垂殺堅垂皆不從悉以兵授堅平南

將軍慕容暉屯鄆城聞堅敗棄其眾遁去至滎陽慕容

德復說暉起兵以復燕祚

尚復德復扶又翻說輸丙翻

暉不從謝安

得驛書知秦兵已敗時方與客圍碁攝書置牀上了無

喜色

也攝收

圍碁如故客問之徐答曰小兒輩遂已破賊

既罷還內過戶限不覺屐齒之折

言其喜甚也史言安矯情鎮物人臣以安

社稷為悅者也大敵壓境一戰而破之安得不喜乎屐齒之折亦非安之嘗也

丁亥謝石等歸

建康得秦樂工能習舊聲於是宗廟始備金石之樂

永嘉

之亂伶官樂器皆沒於劉石江左初立宗廟以無雅樂及伶人省太樂并鼓吹令是後頗得登歌食舉之樂猶有未備太寧末明帝又訪阮孚等增益之咸和中成帝乃復置太樂官鳩集遺工而尚未有金石也及慕容廆平冉閔兵戈之際鄴下樂人頗亦有來者謝尚鎮壽陽採拾樂人以備太樂并制石磬雅樂始頗具而王猛平

鄴慕容氏所得樂聲又入關右今破符堅獲乙未以張其樂工楊蜀等閑習舊樂于是金石始備焉

天錫為散騎常侍

散悉重翻騎奇奇翻

朱序為琅邪內史

秦王

堅收集離散比至洛陽

比必寐翻

衆十餘萬百官儀物軍容

粗備

粗坐五翻

慕容農謂慕容垂曰尊不迫人于險

尊謂其父垂也

慕容令亦呼垂為尊蓋其父子間常稱也

其義聲足以感動天地農聞祕記

曰燕復興當在河陽

燕于賢翻

夫取果於未熟與自落不過

晚旬日之間然其難易美惡相去遠矣

易以豉翻

垂心善其

言行至澠池

澠彌亮翻

言于堅曰北鄙之民聞王師不利輕

相扇動臣請奉詔書以鎮慰安集之因過謁陵廟

垂欲因行

自謁其祖父陵廟也

堅許之權翼諫曰國兵新破四方皆有離心

宜徵集名將置之京師以固根本鎮枝葉

將即亮翻

垂勇略

過人世豪東夏頃以避禍而來其心豈止欲作冠軍而

已哉

夏戶雅翻冠古玩翻

譬如養鷹飢則附人每聞風颯之起常

有凌霄之志正宜謹其條籠

颯扶搖風也釋曰疾風自下而上曰颯音卑逞翻條

他刀翻然絕也所以繼鷹

豈可解縱任其所欲哉堅曰卿言是也然

朕已許之匹夫猶不食言

孔安國曰食言者食盡其言偽不實

況萬乘乎

乘繩  
證翻

若天命有廢興固非智力所能移也翼曰陛下重

小信而輕社稷臣見其往而不返關東之亂自此始矣

堅不聽遣將軍李蠻閔亮尹固帥眾三千送垂又遣驍

騎將軍石越帥精卒三千戍鄴驃騎將軍張蚝帥羽林

五千戍并州鎮軍將軍毛當帥眾四千戍洛陽

驍堅堯  
翻騎奇

寄翻下同帥讀曰率下同驃匹妙翻蚝七吏翻

權翼密遣將士邀垂於河橋南

空倉中垂疑之自涼馬臺結草筏以渡

水經注東郡白馬縣有涼城河

水逕其北有神馬亭西去白馬津可二十許里實中層  
峙南北二百步東西五十許步今按神馬亭既在東郡

白馬正對黎陽岸垂安得越滎洛而至此渡河乎此涼  
馬臺蓋在富平津橋之西也涼馬臺由昔人于河渚浴  
馬浴竟驅馬就  
高納涼因名  
使典軍程同衣已衣乘已馬與僮僕趣

河橋

典軍蓋王國官垂在燕為吳王時所置也同衣于既翻趣七喻翻

伏兵發同馳馬

獲免十二月秦王堅至長安哭陽平公而後入謚曰哀

公大赦復死事者家

復方目翻復其家之賦役也

庚午大赦以謝

石為尚書令進謝玄號前將軍固讓不受謝安壻王

國寶坦之之子也安惡其為人

惡烏路翻

每抑而不用以為

尚書郎國寶自以望族故事唯作吏部不為餘曹

尚書郎晉

制三十五曹置郎二十三人更相統攝及江左無直事  
右民屯田車部別兵都兵騎兵左右士運曹十曹郎康  
穆以後又無虞曹二千石二郎但有殿中祠部吏部儀  
曹三公比部金部倉部度支都官起部水部主客駕部  
庫部中兵外兵十八曹後又省主客起  
部水部餘十五曹而吏部最為清選

固辭不拜由是

怨安國寶從妹為會稽王道子妃帝與道子皆嗜酒狎

昵邪諂

從才用翻  
昵尼質翻

國寶乃譖安于道子使離間之於帝

間古  
覓翻

安功名既盛而險諂求進之徒多毀短安帝由是

稍踈忌之

諂彼  
義翻

初開酒禁

漢建安中曹  
公嚴酒禁

增民稅米口

五石

咸和五年成帝始度百姓田取十分之一率稅畝  
米三升哀帝即位減田租畝收二升太元二年帝

除度田收租之制王公以下口租三斛唯  
蠲在役之身至是年又增稅米口五石

秦呂光行

越流沙三百餘里

自玉門出渡流沙西行至鄯善北行至車師又且末國在鄯善西其國之

西北有流沙數百里夏日有熱風為行旅之患風之所  
至唯老驄預知之即嗅而聚立埋其口鼻於沙中人每  
以為戾亦即將氈擁蔽鼻口其風迅駛斯須過盡若不  
防者必致危斃桑欽曰流沙地在張掖居延縣西北杜  
佑曰流沙在沙州敦煌郡西八十里鄯道元曰弱水入  
流沙流沙與水流行也亦言出鍾山西行極崦嵫之山  
在西海郡北流沙又逕浮渚歷壑市之國又逕于鳥山  
之東朝雲國西歷崦嵫山西南出于過瀛之山大荒山經  
曰西南海之  
外流沙出焉

焉耆等諸國皆降

降戶

惟龜茲王帛純

拒之

龜茲音丘慈

嬰城固守光進軍攻之

秦王堅之入寇

也以乞伏國仁為前將軍領先鋒騎

騎奇寄翻

會國仁叔父

步頽反於隴西堅遣國仁還討之

國仁代司繁鎮勇士見上卷元年

步

頽聞之大喜迎國仁於路國仁置酒大言曰苻氏疲民

逞兵殆將亡矣吾當與諸君共建一方之業及堅敗國

仁遂迫脇諸部有不從者擊而併之衆至十餘萬慕

容垂至安陽

安陽在鄴城西南

遣叅軍田山修牋於長樂公丕

樂音洛

丕聞垂北來疑其欲為亂然猶身自迎之趙秋勸

垂於座取丕因據鄴起兵垂不從丕謀襲擊垂侍郎天

水姜讓諫曰

晉制王國置侍郎二人

垂反形未著而明公擅殺之

非臣子之義不如待以上賓之禮嚴兵衛之密表情狀

聽敕而後圖之不從之館垂於鄴西

館音貫

垂潛與燕之

故臣謀復燕祚會丁零翟斌起兵叛秦

丁零種落本居中山苻堅之滅

燕也徙于新安斌仕秦為衛軍從事中郎斌音彬

謀攻豫州牧平原公暉於洛

陽秦王堅驛書使垂將兵討之

將即亮翻

石越言于丕曰王

師新敗民心未安負罪亡匿之徒思亂者衆故丁零一

唱旬日之中衆已數千此其驗也慕容垂燕之宿望有

興復舊業之心今復資之以兵此為虎傅翼也

今復扶又翻為

于偽翻傳讀曰附

丕曰垂在鄴如藉虎寢蛟

藉慈夜翻

常恐為肘腋

之變

亦脈音

今遠之於外不猶愈乎

遠于願翻

且翟斌凶悖

悖蒲

內翻又清沒翻

必不肯為垂下使兩虎相斃吾從而制之此下

莊子之術也乃以羸兵二千及鎧仗之弊者給垂

羸倫為翻

鎧可亥翻

又遣廣武將軍苻飛龍帥氏騎一千為垂之副

帥讀

曰率奇寄翻

密戒飛龍曰垂為三軍之帥卿為謀垂之將行

矣勉之

成都王穎使和演圖王浚殷浩使魏憬圖姚襄苻丕使苻飛龍圖慕容垂智畧不足以濟其敗

同一轍也帥所  
類翻將即亮翻

垂請入鄴城拜廟

燕都鄴故廟在鄴城

丕弗許乃

潛服而入亭吏禁之垂怒斬吏燒亭而去石越言於丕

曰垂敢輕侮方鎮殺吏燒亭反形已露可因此除之丕

曰淮南之敗垂侍衛乘輿

乘繩證翻

此功不可忘也越曰垂

尚不忠於燕安能盡忠於我失今不取必為後患丕不

從越退告人曰公父子好為小仁不顧大計終當為人

禽耳

丕父子後卒如越之言好呼到翻

垂留慕容農慕容楷慕容紹於

鄴行至安陽之湯池閔亮李毗自鄴來以丕與苻飛龍

所謀告垂

幾事不密則害成苻飛龍固不足以辦垂況其謀已泄邪

垂因激怒其衆

曰吾盡忠於苻氏而彼專欲圖我父子吾雖欲已得乎

已止也

乃託言兵少

少詩

停河內募兵旬日間有衆八千

平原公暉遣使讓垂趣使進兵

遣使疏吏翻趣讀曰促

垂謂飛龍

曰今寇賊不遠

河內距新安洛陽止隔大河耳故云然

當晝止夜行襲其

不意飛龍以為然壬午夜垂遣世子寶將兵居前少子

隆勒兵從已

將即亮翻少詩照翻

令氏兵五人為伍陰與寶約聞

鼓聲前後合擊氏兵及飛龍盡殺之參佐家在西者皆

遣還并以書遺秦王堅言所以殺飛龍之故

蓋言丕使飛龍圖已

故殺之也  
遺于季翻

初垂從堅入鄴

見一百二卷海西公太和五年

以其子麟屢

嘗告變於燕

事見太和四年

立殺其母然猶不忍殺麟置之

舍希得侍見

見賢通翻

及殺苻飛龍麟屢進策盡啟發垂意

垂意所欲為而思慮偶有所未及  
麟能迎其挽言之故謂之啟發

垂更奇之寵待與諸

子均矣

為後麟亂燕張本

慕容鳳及燕故臣之子燕郡王騰遠

西段延等

段延蓋段國之種燕于賢翻

聞翟斌起兵各帥部曲歸之

帥讀日率

平原公暉使武平武侯毛當討斌慕容鳳曰鳳今

將雪先王之恥

燕之亡也鳳父桓死難事見一百二卷海西公太和五年

請為將軍

斬此氐奴

為于偽翻

乃擐甲直進

擐音宦

丁零之衆隨之大敗

秦兵

敗補邁翻

斬毛當遂進攻陵雲臺戍克之收萬餘人甲

仗

陵雲臺魏文帝所築在洛城西秦置戍焉

癸未慕容垂濟河焚橋有衆三

萬留遼東鮮卑可足渾譚集兵於河內之沙城

言河內以別魏

郡之沙城燕主皝后可足渾氏譚蓋亦燕之戚黨也

垂遣田山如鄴密告慕容農

等使起兵相應時日已暮農與慕容楷留宿鄴中慕容

紹先出至蒲池

蒲池在鄴城外慕容雋與群臣宴處

盜丕駿馬數百足以

待農楷甲申晦農楷將數十騎微服出鄴遂同奔列人

列人

縣漢屬鉅鹿郡魏晉屬廣平郡其地在鄴城東北魏收地形志魏郡臨漳縣有列人城別有列人縣亦屬魏郡

九年春正月乙酉朔秦長樂公丕大會賓客

樂音洛請

慕容農不得始覺有變遣人四出求之三日乃知

其在列人已起兵矣慕容鳳王騰段延皆勸翟斌奉慕

容垂為盟主斌從之垂欲襲洛陽且未知斌之誠偽乃

拒之曰吾來救豫州

秦平原公暉以豫州收鎮洛陽

不來赴君君既建

大事成享其福敗受其禍吾無預焉丙戌垂至洛陽平

原公暉聞其殺苻飛龍閉門拒之翟斌復遣長史郭通

往說垂

復扶又細說  
輸芮翻下同

垂猶未許通曰將軍所以拒通者

豈非以翟斌兄弟山野異類無奇才遠略必無所成故

邪獨不念將軍今日憑之可以濟大業乎

謂憑其眾可  
以成功也

垂乃許之於是斌帥其眾來與垂會

帥讀曰  
率下同

勸垂稱尊

號垂曰新興侯吾主也

秦後慕容暉  
封為新興侯

當迎歸返正耳垂

以洛陽四面受敵欲取鄴而據之乃引兵而東故扶餘

王餘蔚為滎陽太守

餘蔚即太和五年開鄴北  
門納秦兵者蔚音行勿翻

及昌黎

鮮卑衛駒各帥其衆降垂

降戶江翻

垂至滎陽群下固請上

尊號垂乃依晉中宗故事

晉元帝廟號中宗上時掌翻

稱大將軍大

都督燕王承制行事

晉元帝稱王承制見九十卷建武元年

謂之統府群

下稱臣文表奏疏封拜官爵皆如王者以弟德為車騎

大將軍封范陽王

寄奇翻

兄子楷為征西大將軍封太原

王

燕本封德為范陽王今復其故楷恪子也恪封太原王今令楷襲父爵

翟斌為建義大

將軍封河南王餘蔚為征東將軍統府左司馬封扶餘

王衛駒為鷹揚將軍慕容鳳為建策將軍

建策將軍亦慕容垂一時

所署帥衆二十餘萬

帥讀曰率

自石門濟河長驅向鄴慕容

農之奔列人也止於烏桓魯利家

魯利本烏桓種而家於列人

利為

之置饌

為于偽翻饌離皖翻又離戀翻饗也

農笑而不食利謂其妻曰惡

奴句絕惡奴蓋郎貴人家貧無以饌之奈何妻曰郎有

雄才大志今無故而至必將有異非為飲食來也

偽為于翻

君亟出遠望以備非常利從之農謂利曰吾欲集兵列

人以圖興復卿能從我乎利曰死生唯郎是從

今世俗多呼其

主為郎主又呼其主之子為郎君

農乃詣烏桓張驤說之曰

驤思將翻說輸芮翻

同下  
家王已舉大事翟斌等咸相推奉遠近響應故來相

告耳驤再拜曰得舊主而奉之敢不盡死於是農驅列

人居民為士卒斬桑榆為兵裂襜裳為旗

稽昌占翻爾雅曰衣蔽前

也郭璞曰衣蔽膝也

使趙秋說屠各畢聰聰與屠各卜勝張延李

白郭超及東夷餘和敕勃

屠直於翻餘和敕勃蓋二人

易陽烏桓劉

大

易陽縣漢屬趙國魏晉屬陽平郡劉昫曰唐洺州臨洺縣古易陽縣也隋開皇六年更名

各帥部

衆數千赴之

帥讀曰率

農假張驤輔國將軍劉大安遠將軍

魯利建威將軍農自將攻破館陶

館陶縣漢屬魏郡魏晉屬陽平郡將即亮

翻收其軍資器械遣蘭汗段讚趙秋慕輿怵略取康臺

牧馬數千匹

怵香衣翻魏收地形志廣平郡平恩縣有康臺澤杜預曰不以道取曰略

汗燕

王垂之從舅讚聰之子也

從才用翻

於是步騎雲集衆至數

萬驤等共推農為使持節都督河北諸軍事驃騎大將

軍監統諸將

使疏吏翻驃匹妙翻騎奇寄翻監工衙翻

隨才部署上下肅然

農以燕王垂未至不敢封賞將士趙秋曰軍無賞士不

往

言無賞以獎激之則士不往赴戰也

今之來者皆欲建一時之功規萬

世之利

規圖也

宜承制封拜以廣中興之基農從之於是

赴者相繼垂聞而善之農間招庫僇官偉於上黨東引

乞特歸於東阿北召光烈將軍平叡及叡兄汝陽太守

幼與燕國偉等皆應之

間古莧翻遣間使招之也僇奴沃翻東阿縣漢屬東郡晉屬濟

北郡唐屬濟州汝陽縣漢晉屬汝南郡後分為汝陽郡平幼蓋先嘗為汝陽太守時居燕國也偉等皆燕之舊

臣故招之而應光烈將軍蓋亦前燕以授平叡

又遣蘭汗攻頓丘克之

頓丘縣漢屬東

郡武帝泰始二年分置頓丘郡

農號令整肅軍無私掠

言其軍不敢掠居民而私其物

士女喜悅長樂公丕使石越將步騎萬餘討之農曰越有智勇之名今不南拒大軍而來此是畏王而陵我也

王謂慕容垂

必不設備可以計取之衆請治列人城

治直之翻下同

農曰善用兵者結士以心不以異物

異物猶言別物也

今起義

兵唯敵是求當以山河為城池何列人之足治也辛卯

越至列人西農使趙秋及參軍綦母滕擊越前鋒破之

越之氣已挫矣

參軍太原趙謙言於農曰越甲仗雖精人心危

駭易破也

易以駭翻

宜急擊之農曰彼甲在人我甲在心

士心

欲聞則雖無甲冑而勇于赴戰故曰甲在心

晝戰則士卒見其外貌而憚之

不如待暮擊之可以必克令軍士嚴備以待毋得妄動

越立柵自固農笑謂諸將曰越兵精士衆不乘初至之

銳以擊我方更立柵吾知其無能為也向暮農鼓譟出

陳於城西

陳讀曰陣

牙門劉木請先攻越柵農笑曰凡人見

美食誰不欲之何得獨請然汝猛銳可嘉當以先鋒惠

汝木乃帥壯士四百騰柵而入秦兵披靡

帥讀曰率下同披普彼翻

農督大衆隨之大敗秦兵斬越送首於垂

敗補邁翻

越與毛

當皆秦之驍將也

驍堅亮翻將即亮翻

故秦王堅使助二子鎮守

既而相繼敗没人情騷動

騷愁也擾也

所在盜賊群起庚戌

燕王垂至鄴改秦建元二十年為燕元年服色朝衣皆

如舊章

朝直  
逢朔

以前岷山公庫偃官偉為左長史前尚書

段崇為右長史滎陽鄭謩等為從事中郎

凡帶前字者  
皆前燕所授

官也慕容農引兵會垂於鄴垂因其所稱之官而授之

即張

驥等所推  
之官也

立世子寶為太子封從弟拔等十七人及甥

宇文輸舅子蘭審皆為王

從才  
用翻

其餘宗族及功臣封公

者三十七人侯伯子男者八十九人可足渾譚集兵得

二萬餘人攻野王拔之

垂使譚集兵於河內之  
泌城遂因而攻拔野王

引兵會

攻鄴平。幼及其弟。獻規亦帥衆數萬。會垂於鄴。長樂公

丕使姜讓。誚讓燕王垂。且說之曰。過而能改。今猶未晚。

也。誚才笑翻垂曰。孤受主上不世之恩。故欲安全。長樂

說輸內翻

公使盡衆赴京師。京師謂長安也然後修復國家之業。與秦永

為鄰好。好呼到翻何故闇於機運。不以鄴城見歸。若迷而不

復。當窮極。兵勢恐單。馬求生亦不可得也。讓厲色責之。

曰。將軍不容於家國。投命聖朝。朝直達翻燕之尺土。將軍豈

有分乎。分扶間翻主上與將軍風殊類別。言氏處關西。鮮卑在東北。既不同風。

族類又別也

一見傾心親如宗戚寵踰勲舊自古君臣際遇

有如是之厚者乎一旦因王師小變遽有異圖長樂公

主上元子受分陝之任

陝失再翻

寧可束手輸將軍以百城

之地乎將軍欲裂冠毀冕

左傳晉率陰戎伐潁景王使屠桓伯辭於晉曰我在伯父

猶衣服之有冠冕木水之有本原民人之有謀主也伯父若裂冠毀冕拔本塞原專棄謀主雖戎狄其何有矣

一自可極其兵勢奚更云云但惜將軍以七十之年懸

首白旗

武王斬紂首懸於太白之旗

高世之忠更為逆鬼耳垂默然

姜讓之辭直垂心內愧故默然無以答

左右請殺之垂曰彼各為其主耳

何罪禮而歸之遺丕書及上秦王堅表陳述利害請送  
丕歸長安堅及丕怒復書切責之

為于偽翻遺于季翻上時掌翻

鷹

揚將軍劉牢之攻秦譙城拔之桓冲遣上庸太守郭寶  
攻秦魏興上庸新城三郡拔之將軍楊佺期進據成固  
擊秦梁州刺史潘猛走之佺期亮之子也

楊亮見上卷太元二年

壬子燕王垂攻鄴拔其外郭長樂公丕退守中城關  
東六州郡縣多送任請降於燕

降戶江翻

癸丑垂以陳留王

紹行冀州刺史屯廣阿

廣阿縣前漢屬鉅鹿郡後漢併入鉅鹿縣有廣阿澤在鉅鹿縣

界即大陸澤也

豐城宣穆公桓冲聞謝玄等有功自以失言

謂去年吾其慚恨成疾二月辛巳卒朝議欲以謝玄為左衽之言也

荆江二州刺史

朝直遙翻

謝安自以父子名位太盛又懼桓

氏失職怨望乃以梁郡太守桓石民為荊州刺史河東

太守桓石虔為豫州刺史豫州刺史桓伊為江州刺史

燕王垂引丁零烏桓之衆二十餘萬為飛梯地道以

攻鄴不拔乃築長圍守之分處老弱於肥鄉

晉志肥鄉縣屬廣平

郡魏收曰天平初併入魏郡臨漳縣隋復分置肥鄉縣唐屬洺州處昌呂翻

築新興城以置

輜重

重直用翻

秦征東府官屬疑參軍高泰燕之舊臣有

貳心

苻丕為征東大將軍高泰先仕燕慕容垂以為從事中郎

泰懼與同郡虞曹從

事吳韶逃歸勃海

秦征東府置虞曹從事掌所部山澤泰與韶皆勃海人也

韶曰燕

軍近在肥鄉宜從之泰曰吾以避禍耳去一君事一君

吾所不為也申紹見而歎曰去就以道可謂君子矣

燕范陽王德擊秦枋頭取之置戍而還

還音旋又讀如字

東胡

王晏據館陶為鄴中聲援鮮卑烏桓及郡縣民據塢壁不從燕者尚衆燕王垂遣太原王楷與鎮南將軍陳留

王紹討之楷謂紹曰鮮卑烏桓及冀州之民本皆燕臣

今大業始爾人心未洽所以小異唯宜綏之以德不可

震之以威吾當止一處為軍聲之本汝巡撫民夷示以

大義彼必當聽從楷乃屯於辟陽

地理風俗記曰廣川西南六十里有辟陽

亭故縣也漢高帝封審食其為侯國魏收地形志長樂郡信都縣有辟陽城

紹帥騎數百往

說王晏為陳禍福

帥讀曰率說輸芮翻為于偽翻

晏隨紹詣楷降于是

鮮卑烏桓及塢民降者數十萬口

降戶江翻

楷留其老弱置

守宰以撫之發其丁壯十餘萬與王晏詣鄴垂大悅曰

汝兄弟才兼文武足以繼先王矣

言足以繼慕容恪也

三月以

衛將軍謝安為太保 秦北地長史慕容泓聞燕王垂

攻鄴亡奔關東收集鮮卑衆至數千還屯華陰敗秦將

軍強永

華戶化翻敗補邁翻強其兩翻

其衆遂盛自稱都督陝西諸軍

事大將軍雍州牧濟北王

陝式冉翻雍于用翻濟子禮翻

推垂為丞相

都督陝東諸軍事領大司馬冀州牧吳王秦王堅謂權

翼曰不用卿言

謂不用翼之言而遣慕容垂也

使鮮卑至此關東之地

吾不復與之爭

復扶又翻

將若泓何乃以廣平公熙為雍州

刺史鎮蒲阪

反音

徵雍州牧鉅鹿公敞為都督中外諸

軍事衛大將軍錄尚書事配兵五萬以左將軍竇衡為

長史龍驤將軍姚萇為司馬以討泓

驃思將

平陽太守慕

容冲亦起兵于平陽有衆二萬進攻蒲坂堅使竇衡討

之庫儋官偉帥營部數萬至鄴燕王垂封偉為安定

王秦冀州刺史阜城侯定守信都高城男紹在其國

高城縣屬勃海郡唐為滄州監山縣

高邑侯亮重合侯謨守常山

重直龍

同

安侯監守中山燕王垂遣前將軍樂浪王溫督諸軍攻

信都不克

樂浪音洛琅

夏四月丙辰遣撫軍大將軍麟益兵

助之定鑒秦王堅之從叔紹謨從弟亮從子也

從才溫用翻

燕王垂之弟子也

慕容泓聞秦兵且至懼帥眾將奔

關東

帥讀曰率下同

秦鉅鹿愍公叡麋猛輕敵欲馳兵邀之姚

萇諫曰鮮卑皆有思歸之志故起而為亂宜驅令出關

不可遏也夫執麋鼠之尾猶能反噬于人

麋鼠一名甘口鼠食物不

痛爾雅曰有蟄毒者麋音奚

彼自知困窮致死于我萬一失利悔將

何及但可鳴鼓隨之彼將奔敗不暇矣

使苻叡能從姚萇之言慕容泓

必東奔慕容冲敗而無所歸必亦就禽矣

敵弗從戰于華澤

華澤即華陰之澤也華戶化翻

敵兵敗為泓所殺萇遣龍驤長史趙都參軍姜協詣秦

王堅謝罪

驤思將翻

堅怒殺之萇懼奔渭北馬牧

馬牧牧馬之地猶漢

之牧苑也於是天水尹緯尹詳南安龐演等

龐皮江翻

糾扇羌豪

帥其戶口歸萇者五萬餘家

帥讀曰率

推萇為盟主萇自稱

大將軍大單于萬年秦王大赦改元白雀

通鑑目錄年經國緯自此

以後姚萇繫之後秦單音蟬

以尹詳龐演為左右長史南安姚晃及

尹緯為左右司馬天水狄伯支等為從事中郎羌訓等

為掾屬王據等為參軍王欽盧姚方城等為將帥

掾以  
絹翻

將即亮翻  
帥所類翻

秦竇衝擊慕容冲於河東大破之冲帥鮮

卑騎八千奔慕容泓泓眾至十餘萬遣使謂秦王堅曰

吳王已定關東可速資備大駕奉送家兄皇帝

暉泓之  
兄也

泓當帥關中燕人翼衛乘輿還返鄴都

乘繩證翻還  
音旋又如字

與

秦以虎牢為界永為鄰好

好呼  
到翻

堅大怒召慕容暉責之

曰今泓書如此卿欲去者朕當相資卿之宗族可謂人

面獸心不可以國士期也暉叩頭流血涕泣陳謝堅久

之曰此自三豎所為非卿之過

三豎謂垂泓冲

復其位待之如

初命暉以書招諭泓冲及垂暉密遣使謂泓曰吾籠中

之人必無還理且燕室之罪人也

暉不能保燕之社稷故自謂為罪人

不

足復顧

復扶又翻

汝勉建大業以吳王為相國中山王為太

宰領大司馬汝可為大將軍領司徒承制封拜聽吾死

問汝便即尊位泓于是進向長安改元燕興 燕王垂

以鄴城猶固會僚佐議之右司馬封衡請引漳水灌之

用曹操攻鄴故智也

從之垂行圍

行下孟翻

因飲於華林園

洛都鄴都皆有華林

園鄴之華林則  
親武所築也

秦人密出兵掩之矢下如雨垂幾不得

出

幾居  
依翻

冠軍大將軍隆將騎衝之垂僅而得免

將即亮  
翻騎奇

寄  
翻

竟陵太守趙統攻襄陽秦荊州刺史都貴奔魯陽

五月秦洛州刺史張五虎據豐陽來降

降戶  
江翻

梁州

刺史楊亮帥衆五萬伐蜀

帥讀  
曰率

遣巴西太守費統將水

陸兵三萬為前鋒

費扶瑞  
將即亮  
翻

亮屯巴郡秦益州刺史王

廣遣巴西太守康回等拒之

姓譜西胡  
自有康姓

秦苻定苻紹

皆降於燕

定以信都  
城降降戶  
江翻下同

燕慕容麟引兵西攻常

山符謨守常山

後秦王萇進屯北地

姚萇書後秦以別於苻秦也

秦華

陰北地新平安定羌胡降之者十餘萬 六月癸丑朔

崇德太后褚氏崩 秦王堅自帥步騎二萬以擊後秦

軍於趙氏塢

據晉書載記趙氏塢在北地帥讀曰率騎奇寄翻

使護軍將軍楊

壁等分道攻之後秦兵屢敗斬後秦王萇之弟鎮軍將

軍尹買後秦軍中無井秦人塞安公谷堰同官水以困

之

安公谷同官水皆在今耀州界魏收地形志北地郡有銅官縣真君七年置杜佑曰銅官本漢役祠縣地

晉為頻陽苻秦於役祠北銅官川置銅官護軍後魏太武罷護軍置銅官縣後周武帝移于今所隋以後唯作

同官塞  
悉則翻

後秦人恟懼有渴死者

恟許拱翻

會天大雨後秦營

中水三尺繞營百步之外寸餘而已後秦軍復振

復扶又翻

秦王堅歎曰天亦佑賊乎

天不助秦不可復支矣

慕容泓謀臣

高蓋等以泓德望不如慕容冲且持法苛峻乃殺泓立

冲為皇太弟承制行事置百官以蓋為尚書令後秦王

萇遣子嵩為質於冲以請和

欲連兵以斃秦且畏冲兵之強也質音致

將

軍劉春攻魯陽都貴奔還長安後秦王萇帥眾七萬

擊秦秦王堅遣楊璧等拒之為萇所敗

敗補邁翻

獲楊璧及

右將軍徐成鎮軍將軍毛盛等將吏數十人萇皆禮而

遣之 燕慕容麟拔常山秦苻亮苻謨皆降

降戶

麟進

圍中山秋七月克之執苻鑒

冀州皆為燕有惟苻丕守鄴而已

麟威聲

大振留屯中山 秦幽州刺史王永平州刺史苻冲帥

二州之衆以擊燕

帥讀曰率

燕王垂遣平朔將軍平規擊永

此平規別是一平規平幼之弟非與苻洛同反之平規也

永遣昌黎太守宋敞逆戰

於范陽敞兵敗規進據薊南

薊音計

秦平原公暉帥洛

陽陝城之衆七萬歸於長安

陝失冉翻

秦王堅聞慕容冲

去長安浸近乃引兵歸

歸自北地趙氏塢使冲不逼長安堅尚與萇相持勝負之勢未

有所定也冲兵既逼堅不容不還長安萇得收嶺北以爲資堅冲血戰而萇伺其散堅死而鮮卑東出萇坐而取關中真所謂鷸蚌相持漁人之利也

遣撫軍大將軍方成驪山

驪力知翻拜

平原公暉爲都督中外諸軍事車騎大將軍錄尚書事

配兵五萬以拒冲冲與暉戰于鄭西大破之堅又遣前

將軍姜宇與少子河間公琳帥衆三萬拒冲於灊上

少詩

照翻琳宇皆敗死冲遂據阿房城

即秦之阿房宮城

秦康回兵

數敗

數所角翻

退還成都梓潼太守壘襲以涪城來降

此西晉師

之捷姓譜曰後趙錄有壘澄本姓裴氏

荊州刺史桓石民據魯陽遣河南

太守高茂北戍洛陽

此晉自襄沔北向之師也

已酉冀康獻皇后

於崇平陵

燕翟斌恃功驕縱邀求無厭

斌音彬厭於監翻

又

以鄴城久不下潛有貳心太子寶請除之燕王垂曰河

南之盟不可負也

斌引兵會垂于洛陽垂與之盟蓋在河南縣

若其為難

難乃

旦罪由於斌今事未有形而殺之人必謂我忌憚其功

能吾方收攬豪傑以隆大業不可示人以狹失天下之

望也藉彼有謀吾以智防之無能為也范陽王德陳留

王紹驃騎大將軍農皆曰翟斌兄弟恃功而驕必為國

患垂曰驕則速敗焉能為患

焉于乾翻何也

彼有大功當聽其

自斃耳禮遇彌重斌諷丁零及其黨請斌為尚書令垂

曰翟王之功宜居上輔但臺既未建此官不可遽置耳

斌怒密與前秦長樂公丕通謀

通鑑凡符秦事書曰秦此前字衍

使丁

零決隄潰水

燕引渾水以灌鄴故斌欲決隄以潰之

事覺垂殺斌及其弟

擅敏餘皆赦之斌兄子真夜將營眾北奔邯鄲

將即亮翻邯鄲

音寒丹

引兵還向鄴圍欲與丕內外相應太子寶與冠軍

大將軍隆擊破之

冠古玩翻

真還走邯鄲

走音奏

太原王楷陳

留王紹言於垂曰丁零非有大志但寵過為亂耳今急

之則屯聚為寇緩之則自散散而擊之無不克矣垂從

之 龜茲王帛純窘急

呂光自去年進軍攻龜茲音丘慈窘渠隕翻

重賂

獐胡以求救

獐胡蓋又在龜茲之西揚正衡曰獐古邁字

獐胡王遣其弟唃

龍侯將廼帥騎二十餘萬

唃龍一人廼又一人侯將官稱也漢時西域諸國各有輔

國侯安國侯左右將其後蓋併戾將為一官

并引溫宿

唃女劣翻又女鬱翻將即亮翻廼渠追翻

尉頭等諸國兵合七十餘萬以救龜茲秦呂光與戰於

城西大破之帛純出走王侯降者三十餘國

降戶江翻

光入

其城城如長安市邑宮室甚盛光撫寧西域威恩甚著  
遠方諸國前世所不能服者皆來歸附上漢所賜節傳

上時掌翻  
傳張戀翻

光皆表而易之立帛純弟震為龜茲王 八

月翟真自邯鄲北走燕王垂遣太原王楷驃騎大將軍  
農帥騎追之及於下邑楷欲戰農曰士卒饑倦且視賊  
營不見丁壯殆有他伏楷不從進戰燕兵大敗真北趨

中山屯於承營

羸師示弱者必有伏兵衆所通知也然  
而往往墮其中而不自覺以致覆軍者

多矣趨七  
諭翻下同

鄴中芻糧俱盡削松木以飼馬

飼祥吏翻

燕王垂

謂諸將曰苻丕窮寇必無降理

降戶江翻

不如退屯新城

即肥

鄉之新  
興城也

開丕西歸之路以謝秦王疇昔之恩且為討翟

真之計丙寅夜垂解圍趨新城遣慕容農徇清河平原

徵督租賦農明立約束均適有無軍令嚴整無所侵暴

由是穀帛屬路軍資豐給

屬之欲翻

戊寅南昌文穆公郝

愔薨

郝丑之翻  
愔挹淫翻

太保安奏請乘苻氏傾敗開拓中原

以徐兗二州刺史謝玄為前鋒都督帥豫州刺史桓石

虔伐秦

帥讀曰率

玄至下邳秦徐州刺史趙遷棄彭城走玄

進據彭城

此晉自淮泗北向之師也

秦王堅聞呂光平西域以光

為都督玉門以西諸軍事西域校尉道絕不通秦幽

州刺史王永求救於振威將軍劉庫仁

先是秦蓋授劉庫仁振武將軍

庫仁遣其妻兄公孫希帥騎三千救之大破平規於薊

南乘勝長驅進據唐城

中山郡之唐縣城也

九月謝玄使彭城

內史劉牢之攻秦兗州刺史張崇辛卯崇棄鄆城奔燕

牢之據鄆城

鄆古據翻

河南城堡皆來歸附

太保安上疏

自求北征加安都督揚江等十五州諸軍事加黃鉞

五十

州蓋揚徐南徐兗南兗豫南  
豫江青冀幽并司荆雍也

慕容冲進逼長安秦王

堅登城觀之歎曰此虜何從出哉大呼責冲曰

呼火故翻

奴

何苦來送死冲曰奴厭奴苦欲取汝為代耳冲少有寵

於堅

冲少有龍陽色得幸于堅少詩詔翻

堅遣使以錦袍稱詔遺之

遺於季翻

冲遣詹事稱皇太弟令答之曰孤今心在天下豈顧一

袍小惠苟能知命君臣束手早送皇帝

皇帝謂慕容暉

自當寬

貸苻氏以酬曩好

好呼到翻

堅大怒曰吾不用王景略陽平

公之言

事見一百三卷寧康三年及上卷大元七年

使白虜敢至於此

載記曰秦

人率謂鮮卑為白虜

冬十月辛亥朔日有食之 乙丑大赦

謝玄遣陰陵太守高素攻秦青州刺史苻朗

陰陵縣漢屬九江郡

晉書謝玄傳作淮陵淮陵縣前漢屬臨淮郡後漢屬下邳郡晉復屬臨淮郡惠帝元康七年分置淮陵郡陰當

淮作軍至琅邪朗來降朗堅之從子也

降戶江翻從才用翻

翟真

在承營與公孫希宋敞遙相首尾

公孫希劉庫仁所遣宋敞王永所遣

長

樂公丕遣宦者冗從僕射清河光祚

姓譜光姓燕人曰光之後秦末子孫

避地以光為氏冗而隴翻從才用翻

將兵數百赴中山與真相結又遣陽

平太守邵興將數千騎招集冀州故郡縣與祚期會襄

國是時燕軍疲弊秦勢復振

復扶又翻

冀州郡縣皆觀望成

敗趙郡人趙粟等起兵柏鄉以應興

魏收地形志南趙郡柏人縣有柏鄉

城九域志曰柏鄉故城春秋時晉鄆邑五代志隋文帝開皇十六年置柏鄉縣屬趙郡

燕王垂遣

冠軍大將軍隆龍驤將軍張崇將兵邀擊興命驃騎大

將軍農自清河引兵會之

冠古玩翻驤思將翻驃匹妙翻騎奇寄翻

隆與興

戰于襄國大破之興走至廣阿遇慕容農執之光祚聞

之循西山走歸鄆隆遂擊趙粟等皆破之冀州郡縣復

從燕

復扶  
又翻

劉庫仁聞公孫希已破平規欲大舉兵以

救長樂公丕發鴈門上谷代郡兵屯繁時

時音止

燕太子

太保慕輿句之子文零陵公慕輿虔之子常

慕輿句見  
九十八卷

穆帝永和六年慕輿虔見一百  
一卷哀帝興寧三年句音鉤

時在庫仁所知三郡兵

不樂遠征

樂音洛

因作亂夜攻庫仁殺之竊其駿馬奔燕

公孫希之衆聞亂自潰希奔翟真庫仁弟頭眷代領庫

仁部衆 秦長樂公丕遣光祚及參軍封孚召驃騎將

軍張蚝并州刺史王騰於晉陽以自救蚝騰以衆少不

能赴

秦以鄧羌張蚝為萬人敵是時鄧羌死矣張蚝卒不能救秦之亡是知徒勇而無謀者無益于成敗

之數也蚝七吏翻

丕進退路窮謀於僚佐司馬楊膺請自歸於

晉丕未許會謝玄遣龍驤將軍劉牢之等據礪礪

礪礪城濟

北郡治所汾河要地也礪丘交翻礪牛交翻楊正衡曰礪口勞翻杜佑曰礪口交翻礪音教

濟陽太

守郭滿據滑臺

沈約曰晉惠帝分陳留為濟陽國滑臺漢之白馬唐之滑州也宋南渡後遺范

成大北使時河以南徙滑州及白馬縣皆在河北古滑州已淪于河中矣剝水在濬州西南積水若河對濬州

城即黎陽山濟子禮翻

將軍顏肱劉襲軍于河北

河北滑臺之北岸也

丕遣

將軍桑據屯黎陽以拒之劉襲夜襲據走之遂克黎陽

不懼乃遣從弟就與參軍焦達請救於玄

從才用翻

致書稱

欲假途求糧西赴國難

難乃旦翻

須援軍既接以鄴與之若

西路不通長安陷沒請帥所領保守鄴城

帥讀曰率

達與參

軍姜讓密謂膺曰今喪敗如此

喪息浪翻

長安阻絕存亡不

可知屈節竭誠以求糧援猶懼不獲而公豪氣不除方

設兩端事必無成宜正書為表許以王師之至當致身

南歸如其不從可逼縛與之膺自以力能制不

楊膺不之妃兄

故自以為力能制不

乃改書而遣之

謝玄遣晉陵太守滕恬之

渡河守黎陽恬之修之曾孫也

滕修為吳將孫皓之亡修歸晉

朝廷以

充青司豫既平加立都督徐充青司冀幽并七州諸軍事  
後秦王苻聞慕容冲攻長安會群僚議進止皆曰

大王宜先取長安建立根本然後經營四方苻曰不然  
燕人因其衆有思歸之心以起兵若得其志必不久留

關中吾當移屯嶺北

嶺北謂九峻之北凡新平北地安定之地皆是也

廣收資

實以待秦亡燕去然後拱手取之耳乃留其長子興守

北地

長知兩翻

使寧北將軍姚穆守同官川自將其衆攻新

平將即亮翻初新平人殺其郡將秦王堅缺其城角以耻之

石虎之末清河崔悅為新平相為郡人所殺悅子液仕  
堅為尚書郎自表父仇不同天地請還冀州堅愍之禁  
銅新平人缺其城角  
新平民望深以為病民望郡之賢豪為一郡所

宗嚮者欲立忠義以雪之及後秦王苻萇至新平新平太守

南安苟輔欲降之苟輔氏也秦之外戚降戶江翻下同郡人遼西太守馮

傑蓮勺令馮羽尚書郎趙義汶山太守馮苗諫曰昔田

單以一城存齊傑等皆新平人太康地志曰汶山郡漢武帝立孝宣地節三年合蜀郡劉蜀又

立節蓮音輦汶讀曰岷田單事見四卷周赧王三十六年今秦之州鎮猶連城過百

奈何遽為叛臣乎輔喜曰此吾志也但恐久而無救郡

人橫被無辜

橫戶  
孟翻

諸君能爾吾豈顧生哉於是憑城固

守後秦為土山地道輔亦於內為之或戰地下或戰山  
上後秦之眾死者萬餘人輔詐降以誘萇萇將入城覺  
之而返輔伏兵邀擊幾獲之

幾巨  
依翻

又殺萬餘人隴西

處士王嘉隱居倒虎山

水經注倒虎山在新  
豐縣南處昌呂翻

有異術能

知未然秦人神之秦王堅後秦王萇及慕容冲皆遣使  
迎之十一月嘉入長安眾聞之以為堅有福故聖人助

之三輔堡壁及四山氏羌歸堅者四萬餘人堅置嘉及沙門道安於外殿動靜咨之燕慕容農自信都西擊

丁零翟遼于魯口破之遼退屯無極農屯藁城以逼之

無極縣漢屬中山晉省後魏復置無極縣唐末為祁州治所藁城縣前漢屬真定後漢屬鉅鹿晉省今所屯蓋故縣城也唐復置遼真之從兄也從才用翻鮮卑在長安藁城縣屬恒州

城中者猶千餘人慕容紹之兄肅與慕容暉陰謀結鮮卑為亂十二月暉白堅以其子新昏請堅幸其家置酒欲伏兵殺之堅許之會天大雨不果往事覺堅召暉及

肅肅曰事必洩矣入則俱死今城內已嚴

已嚴者謂鮮卑之衆也

不如殺使者馳出既得出門大衆便集暉不從遂俱入  
堅曰吾相待何如而起此意暉飾辭以對肅曰家國事

重何論意氣

意氣謂堅相待之厚

堅先殺肅乃殺暉及其宗族城

內鮮卑無少長男女皆殺之

少詩照翻長知兩翻

燕王垂幼子柔

養於宦者宋牙家為牙子故得不坐與太子寶之子盛

乘間得出奔慕容冲

為後慕容盛等自長子歸燕張本間古覓翻

燕慕容

麟慕容農合兵襲翟遼大破之遼單騎奔翟真 燕王

垂以秦長樂公丕猶據鄴不去乃更引兵圍鄴開其西

走之路

垂志在得鄴故開其走路所謂圍城為之缺也

焦達見謝玄玄欲徵丕

任子然後出兵達固陳丕款誠并述揚膺之意玄乃遣

劉牢之滕恬之等帥眾二萬救鄴

帥讀曰率

丕告饑玄水陸


運米二千斛以饋之秦梁州刺史潘猛棄漢中奔長

安

梁州之地自此復歸于晉



資治通鑑卷一百五



總校官庶吉士臣侍朝

校對官檢討臣王坦修

謄錄監生臣何廷宰

欽定四庫全書薈要

史部

資治通鑑卷一百六

詳校官編修臣汪鏞




欽定四庫全書薈要卷七千九十二

史部

資治通鑑卷一百六

宋司馬光撰

胡三省音註

晉紀二十八

起梅蒙作噩盡柔兆閏茂凡二年

烈宗孝武皇帝中之上

太元十年春正月秦王堅朝饗群臣

朝直遙翻

時長安饑人

相食諸將歸吐肉以飼妻子

窮匱如此外無救援烏得不敗乎飼祥吏翻

慕容冲即皇帝位於阿房

是為西燕

改元更始冲有自得之

志賞罰任情慕容盛年十三謂慕容柔曰夫十人之長

長知  
兩翻

亦須才過九人然後得安今中山王才不逮人功

未有成而驕汰已甚殆難濟乎

沖在前燕時封中山王  
汰侈也濫也史言慕容

盛幼而有識略所以能自奮而  
有國盛柔歸沖見上卷上年

後秦王苻留諸將攻

新平自引兵擊安定擒秦安西將軍勃海公珍嶺北諸

城悉降之

降戶  
江翻

甲寅秦王堅與西燕主沖戰于仇班

渠大破之

慕容垂復興于山東而沖稱  
號于關中故書西燕以別之

乙卯戰于雀桑

又破之甲子戰于白渠

白渠即漢時白  
公所鑿者也

秦兵大敗西燕

兵圍秦王堅殿中將軍鄧邁力戰却之堅乃得免壬申

冲遣尚書令高蓋夜襲長安入其南城左將軍竇衝前

禁將軍李辯等擊破之斬首八百級分其屍而食之乙

亥高蓋引兵攻渭北諸壘太子宏與戰於成貳壁

成貳蓋人

姓名關中大亂立壁自保因為地名

大破之斬首三萬

燕帶方王佐與

寧朔將軍平規共攻薊

薊音計

王永兵屢敗二月永使宋

敞燒和龍及薊城宮室帥衆三萬奔壺關

帥讀曰率

佐等入薊

慕容農引兵會慕容麟於中山與共攻翟真麟農先帥

數千騎至承營

帥讀曰率下同

觀察形勢翟真望見陳兵而出

諸將欲退農曰丁零非不勁勇而翟真懦弱令簡精銳

望真所在而衝之真走衆必散矣乃邀門而蹙之可盡

殺也使驍騎將軍慕容國帥百餘騎衝之

驍堅堯翻奇寄翻

真

走其衆爭門自相蹈藉

藉慈夜翻

死者大半遂拔承營外郭

癸未秦王堅與西燕主冲戰於城西

長安城西也

大破之

追奔至阿城

阿城即阿房宮城冲之巢穴也

諸將請乘勝入城堅恐為

冲所掩引兵還

萬乘之主固不可乘危徼幸然秦喪敗若此乘諸將之勝氣以圖萬一之功可

也引兵而還何  
歟還從宣翻

乙酉秦益州刺史王廣以蜀人江陽

太守李丕為益州刺史守成都

沈約曰江陽郡劉璋分犍為立守式又翻

已

丑廣帥所部奔還隴西蜀人隨之者三萬餘人

劉牢

之至枋頭楊膺姜讓謀泄

膺讓謀見上卷上年

長樂公丕收殺之

枋音方樂音洛

牢之聞之盤桓不進

秦平原悼公暉數為西

燕主冲所敗

數所角翻敗補邁翻

秦王堅讓之曰汝吾之才子也

擁大衆與白虜小兒戰而屢敗何用生為三月暉憤恚

自殺

堅責怒暉欲其死戰耳豈意其自殺哉恚于避翻

前禁將軍李辯都水使

者隴西彭和正恐長安不守召集西川人

晉書職官志都水長屬大

司農沈約志都水使者掌舟航及運部李辯李儼之子亦隴西人也

屯於韭園堅召之不

至

為後堅襲韭園張本韭舉有翻

西燕主冲攻秦高陽愍公方于驪

山殺之

符方戍驪山見上卷上年七月

執秦尚書韋鍾以其子謙為馮

翊太守使招集三輔之民馮翊壘主邵安民等責謙曰

君雍州望族

七相五公雍州之望族鍾蓋韋賢後也雍于用翻

今乃從賊與之

為不忠不義何面目以行於世乎謙以告鍾鍾自殺謙

來奔秦左將軍苟池右將軍俱石子與西燕主冲戰于

驪山兵敗西燕將軍慕容永斬苟池俱石子奔鄴永廐

弟運之孫石子難之弟也

俱難見一百四卷太元三年廐戶罪翻

秦王堅

遣領軍將軍楊定擊冲大破之虜鮮卑萬餘人而還悉

阮之定佛奴之孫也

北史曰定佛奴之子佛奴宋奴之子也

滎陽人鄭

熒以郡來降

降戶江翻

燕王垂攻鄴久不下將北詣冀州

乃命撫軍大將軍麟屯信都樂浪王溫屯中山召驃騎

大將軍農還鄴

樂浪音洛琅驃匹妙翻騎奇寄翻

於是遠近聞之以燕

為不振頗懷去就農至高邑

高邑本鄆縣漢光武即位于此改曰高邑屬常山晉

志屬趙國

遣從事中郎駐遼近出違期不還

師古曰駐息隨翻

長史

張攀言於農曰遼目下參佐

目下參佐言其近在眼前也

敢欺罔不

還請回軍討之農不應敕備假板以遼為高陽太守參

佐家在趙北者悉假署遣歸

趙北趙國以北也假署者權時以假板署置其官未

以曰燕王垂也

凡舉補太守三人長史二十餘人退謂攀曰君

所見殊誤當今豈可自相魚肉俟吾北還遼等自當迎

于道左君但觀之

為遼迎寇張本

樂浪王溫在中山兵力甚

弱丁零四布分據諸城溫謂諸將曰以吾之衆攻則不

足守則有餘驃騎撫軍首尾連兵會須滅賊但應聚糧

厲兵以俟時耳於是撫舊招新勸課農桑民歸附者相

繼郡縣壁壘爭送軍糧倉庫充溢翟真夜襲中山溫擊

破之自是不敢復至

復扶又翻  
下復還同

溫乃遣兵一萬運糧以

餉垂且營中山宮室

欲迎垂  
郡中山

劉牢之攻燕黎陽太守

劉撫于孫就柵

孫就人姓名蓋立柵于  
黎陽界劉撫因屯焉

燕王垂留慕容

農守鄴圍自引兵救之秦長樂公丕聞之出兵乘虛夜

襲燕營農擊敗之

敗補  
邁翻

劉牢之與垂戰不勝退屯黎陽

垂復還鄴

呂光以龜茲饒樂

龜茲音丘  
慈樂音洛

欲留居之天

竺沙門鳩摩羅什謂光曰此凶亡之地不足留也

據載  
記鳩

摩羅姓也  
什其名

將軍但東歸中道自有福地可居

鳩摩羅什  
知數知呂

光必得涼州  
之地而據之

光乃大饗將士議進止衆皆欲還乃以駝

二萬餘頭載外國珍寶奇玩驅駿馬萬餘匹而還

還音  
旋又

如字夏四月劉牢之進兵至鄴燕王垂逆戰而敗遂撤

圍進屯新城乙卯自新城北遁牢之不告秦長樂公丕

即引兵追之不聞之發兵繼進庚申牢之追及垂於董

唐淵垂曰秦晉瓦合相待為彊

瓦合言其勢不膠固觸而動之一瓦墜碎則衆

瓦俱解矣待當作恃今觀待字義亦自通

一勝則俱豪一失則俱潰非同心

也今兩軍相繼勢既未合宜急擊之牢之軍疾趨二百

里至五橋澤

五橋澤在臨漳縣北兵法百里而趨利者蹶上將況二百里乎

爭燕輜重

重直用翻

垂邀擊大破之斬首數千級牢之單馬走會秦救

至得免燕冠軍將軍宜都王鳳

冠古玩翻

每戰奮不顧身前

後大小二百五十七戰未嘗無功垂戒之曰今大業甫

濟汝當先自愛使為車騎將軍德之副以抑其銳

以德持重

也 鄴中饑甚長樂公丕帥衆就晉穀於枋頭

帥讀曰率

劉牢

之入鄴城收集亡散兵復少振

復扶又翻少詩沼翻

坐軍敗徵還

燕秦相持經年

去年正月垂攻鄴

幽冀大饑人相食邑落蕭條

燕之軍士多餓死燕王垂禁民養蠶以桑椹為軍糧垂

將北趣中山

趣七喻翻

以驃騎大將軍農為前驅前所假授

吏睦邃等皆來迎候上下如初李攀乃服農之智略

前作

張攀此作李攀未知孰是

會稽王道子好專權

好呼到翻

復為姦諂者

所構扇

復扶又翻下同

與太保安有隙安欲避之會秦王堅來

求救安乃請自將救之

將即亮翻

壬戌出鎮廣陵之步丘築

壘曰新城而居之

今揚州邵伯鎮即其地也在揚州城北六十里晉史云安于步丘築塼後

人謂之召伯塼

蜀郡太守任權攻拔成都斬秦益州刺史李

丕復取益州

秦取益州見一百三卷寧康元年任音壬

新平糧竭矢盡

後秦

自去年攻新平

外救不至後秦王萇使人謂苟輔曰吾方以義

取天下豈讐忠臣邪卿但帥城中之人還長安吾止欲

得此城耳輔以為然帥民五千口出城萇圍而阮之男

女無遺

萇仲良翻帥讀曰率

獨馮傑子終得脫奔長安

馮傑勸輔拒後秦事

見上卷  
上年

秦王堅追贈輔等官爵皆謚曰節愍侯以終為

新平太守

翟真自承營徙屯行唐

即漢之南行唐縣也屬常山郡燕王

垂趣中山真為所逼故徙屯

真司馬鮮于乞殺真及諸翟自立為趙

王營人共殺乞立真從弟成為主其衆多降於燕

降戶江胡

五月西燕主冲攻長安秦王堅身自督戰飛矢滿體

流血淋漓冲縱兵暴掠關中士民流散道路斷絕千里

無烟有堡壁三十餘推平遠將軍趙敖為主

安遠平遠二將軍號

蓋皆當時所置相與結盟冒難遣兵糧助堅多為西燕所殺堅

謂之曰聞來者率不善達此誠忠臣之義然今寇難殷

繁

難乃旦翻殷衆也盛也繁多也

非一人之力所能濟也徒相隨入虎

口何益汝曹宜為國自愛

偽為于翻

畜糧厲兵以俟天時庶

幾善不終否有時而泰也

幾居希翻否皮鄙翻

三輔之民為冲所

畧者遣人密告堅請遣兵攻冲欲縱火為內應堅曰甚

哀諸卿忠誠然吾猛士如虎豹利兵如霜雪困於烏合

之虜豈非天乎恐徒使諸卿坐致夷滅吾不忍也其人

固請不已乃遣七百騎赴之冲營縱火者反為風火所

燒其得免者什一二堅祭而哭之

史言關中之人乃心為堅而力不能濟蓋

天素秦也

衛將軍楊定與冲戰于城西為冲所擒定秦之驍

將也

驍堅亮期將即亮期

堅大懼以讖書云帝出五將久長得

據載

記此讖書謂之古符傳賈錄秦王堅始也禁人學識及喪敗之極乃欲用讖書奔五將山以求免其顛倒錯繆甚矣蓋死期將至也讖楚諧說乃留太子宏守長安謂之曰天其或者

欲導予出外汝善守城勿與賊爭利吾當出隴收兵運糧以給汝遂帥騎數百與張夫人及中山公詵二女寶

錦出奔五將山

新唐書地理志京兆醴泉縣有武將山水經注扶風杜陽縣有五將山又按唐

杜佑鳳翔府岐山縣有五將山

宣告州郡期以孟冬救長安堅過襲菲

園李辯奔燕

奔西燕也

彭和正慙自殺

閏月以廣州刺史

羅友為益州刺史鎮成都

庚戌燕王垂至常山圍翟

成於行唐命帶方王佐鎮龍城六月高句麗寇遼東

如句

字又音駒麗力知翻

佐遣司馬郝景將兵救之為高句麗所敗

敗補適翻

高句麗遂陷遼東玄菟

自此燕不能勝高句麗菟同都翻

秦太子宏

不能守長安將數千騎與母妻宗室西奔下辨

辨皮菟翻

百

官逃散司隸校尉權翼等數百人奔後秦

權翼本姚襄僚屬苻氏既

敗政奔  
後秦

西燕主冲入據長安縱兵大掠死者不可勝計

勝音  
升

秋七月旱饑井皆竭

後秦王萇自故縣如新

平

漢安定郡有安定縣  
後漢晉省故曰故縣

秦王堅至五將山後秦王萇

遣驍騎將軍吳忠帥騎圍之秦兵皆散走獨侍御十數

人在側堅神色自若坐而待之召宰人進食俄而忠至

執之送詣新平幽於別室太子宏至下辨南秦州刺史

楊壁拒之

苻堅破仇池置南秦州楊壁氏之種類仕秦  
尚主任居方面以宏奔敗拒而不納孟子曰

寡助之至親戚  
叛之信哉斯言

壁妻堅之女順陽公主也棄其夫從宏

宏奔武都投氏豪強熙

強其兩翻

假道來奔詔處之江州

符為

宏附桓玄而誅張本處昌呂翻

長樂公丕帥衆三萬自枋頭將歸鄴城

龍驤將軍檀玄擊之戰于谷口

檀玄晉將也谷口在枋頭西

玄兵敗

丕復入鄴城

復扶又翻

燕建節將軍餘巖叛自武邑北趣

幽州

趣七喻翻

燕王垂馳使敕幽州將平規曰

使疏吏翻

固守勿

戰侯吾破丁零自討之規出戰為巖所敗

敗補邁翻

巖入薊

掠千餘戶而去遂據令支

令音鈴又郎定翻支音祈

癸酉翟成長史

鮮于得斬成出降垂屠行唐盡阮成衆

去年丁零叛燕至是而滅降戶

江翻 太保安有疾求還安屯廣陵步丘詔許之八月安至建康

甲午大赦 丁酉建昌文靖公謝安薨謚法柔德安衆曰靖寬樂

令終 詔加殊禮如大司馬溫故事晉以此崇寵謝安安之雅志豈願與桓溫

同 庚子以司徒琅邪王道子領揚州刺史錄尚書都督

中外諸軍事道子得權晉自此亂以尚書令謝石為衛將軍 後

秦王苻使求傳國璽於秦王堅璽斯氏翻曰苻次應歷數可

以為惠堅瞋目叱之曰小羌敢逼天子五胡次序無汝

羌名

胡羯鮮卑氏羌五胡之次序也無汝羌名謂識文耳姚苻自謂次應歷數堅故亦以識文為言瞋七

人翻璽已送晉不可得也。萇復遣右司馬尹緯說堅求為

禪代

復扶又翻說輸芮翻

堅曰：禪代聖賢之事，姚萇叛賊，何得為

之堅與緯語問緯在朕朝何官

朝直遙翻

緯曰：尚書令史

後漢

以來尚書有令史十八人秩二百石

堅歎曰：卿王景略之儔，宰相才也。而

朕不知卿宜其亡也。堅自以平生遇萇有恩，尤忿之。數

罵萇求死

數所角翻

謂張夫人曰：豈可令羌奴辱吾兒？乃先

殺寶錦

堅自知身死之後女必當歸姚萇也

辛卯，萇遣人縊堅於新平佛

寺

年四十八

張夫人中山公詵，皆自殺。後秦將士皆為之哀。

慟

偽為于翻

萇欲隱其名謚堅曰壯烈天王

臣光曰論者皆以為秦王堅之亡由不殺慕容垂姚萇故也臣獨以為不然許劭謂魏武帝治世之能臣

亂世之姦雄

事見五十八卷漢靈帝中平元年治直吏翻

使堅治國無失

其道

治直翻

則垂萇皆秦之能臣也烏能為亂哉堅之

所以亡由驟勝而驕故也魏文侯問李克吳之所以亡對曰數戰數勝文侯曰數戰數勝國之福也何故

亡對曰數戰則民疲數勝則主驕

數所以角翻

驕主御疲

民未有不亡者也秦王堅似之矣

長樂公丕在鄴將西赴長安

樂音洛

幽州刺史王永在壺

關

是年春王永自幽州奔壺關

遣使招丕丕乃帥鄴中男女六萬餘

口西如潞川

使疏吏翻帥讀曰率

驃騎將軍張蚝并州刺史王騰

迎之入晉陽

驃匹妙翻騎奇寄翻蚝七吏翻

丕始知長安不守堅已死

乃發喪即皇帝位

丕字永叔堅之庶長子也

追謚堅曰昭宣皇帝廟

號世祖大赦改元大安

燕王垂以魯王和為南中郎

將鎮鄴遣慕容農出囂

囂于結翻囂于公翻

歷凡城趣龍城

題七  
前

會兵討餘巖慕容麟慕容隆自信都徇勃海清河

麟擊勃海太守封懿執之因屯歷口

水經注清河自廣川東北流逕歷縣

故城南前漢信都國之屬縣也應劭曰廣川縣西北三十里有歷城亭故縣也今亭在縣東天津濟之所謂之歷

口懿放之子也

封放見九十九卷  
穆帝永和七年

鮮卑劉頭眷擊破

賀蘭部于善無

善無縣前漢屬雁門郡後漢屬定襄郡漢末日棄之荒外

又破柔然

于意親山

意親山蓋即意辛山親辛語相近按魏書帝紀道武帝五年四月幸意辛山與質驍討

賀蘭統突鄰統奚諸部大破之六月還幸牛川則意辛山在牛川之北

頭眷子羅辰言於

頭眷曰比來行兵所向無敵

比毗  
三翻

然心腹之疾願早圖

之頭眷曰誰也羅辰曰從兄顯忍人也

從才用翻

必將為亂

頭眷不聽顯庫仁之子也頃之顯果殺頭眷自立又將

殺拓跋珪

珪依劉庫仁見一百四卷太元元年

顯弟亢塗妻珪之姑也

塗與

泥同以告珪母賀氏顯謀主梁六眷代王什翼犍之甥也

犍居言

亦使其部人穆崇奚牧密告珪

魏書官氏志拓跋氏之先兼并

它國各有本部部中別族為內姓丘穆陵氏後改為穆氏又拓拔鄰以弟為達奚氏後改為奚氏

且以

其愛妻駿馬付崇曰事泄當以此自明賀氏夜飲顯酒

令醉

飲于鵠

使珪陰與舊臣長孫犍元他羅結輕騎亡去

元他羅結二人  
也他唐何翽

向晨賀氏故驚廐中群馬使顯起視之

賀氏哭曰吾子適在此今皆不見汝等誰殺之邪顯以

故不急追珪遂奔賀蘭部依其舅賀訥

賀訥本賀蘭訥  
後魏孝文帝改

北方舊姓以賀蘭氏為賀氏史因簡便  
而書之如上文穆崇奚拔之類皆是也

訥驚喜曰復國

之後當念老臣珪笑曰誠如舅言不敢忘也顯疑梁六

眷泄其謀將囚之穆崇宣言曰六眷不顧恩義助顯為

逆我掠得其妻馬足以解忿顯乃捨之賀氏從弟外朝

大人賀悅舉所部以奉珪

賀悅蓋什翼捷時為外朝大  
人魏書官氏志曰登國二年

因舊制置南北天人對治二部又置外朝大人無常貢  
主受詔命外使出禁中國有大喪大禮皆與參知隨所  
典焉從才用翻顯怒將殺賀氏賀氏奔亢塗家匿神車中三日

北人無室屋逐水草置神于車中而嚴事之因謂之神車亢塗舉家為之請乃得免

為于偽翻故南部大人長孫嵩帥所部七百餘家叛顯奔五

原嵩依劉氏亦見一百四卷太元元年時拓跋寔君之

子渥亦聚眾自立嵩欲從之烏渥謂嵩曰逆父之子不

足從也寔君弒什翼犍不如歸珪嵩從之史言長孫嵩

臣福流子孫功久之劉顯所部有亂故中部大人庾和辰

奉賀氏奔珪

凡言故者皆什翼犍舊所署置也魏書官氏志拓拔詰汾時餘部諸姓內入者自有

庾氏非中國之庾氏也

賀訥弟染干以珪得衆心忌之使其黨戾

引七突殺珪代人尉古真知之以告珪戾引七突不敢

發

戾引七突官氏志無此氏志云諸姓年世稍久互以改易興衰存滅間有之今舉其可知者則其不可知

而不舉者亦有之矣西方尉遲氏後改為尉氏尉讀曰鬱

染干疑古真泄其謀執而

訊之

訊鞠問也

以兩車輪夾其頭傷一目不伏乃免之染干

遂舉兵圍珪賀氏出謂染干曰汝等欲於何置我而殺

吾子乎染干慙而去

史言賀訥兄弟不能舉部以奉拓跋珪為珪攻賀蘭部張本夫以珪

備嘗險阻艱難以成大業而卒斃于賀蘭氏宣天道邪

九月秦王丕以張蚝為

侍中司空

蚝七吏翻

王永為侍中都督中外諸軍事車騎大

將軍尚書令王騰為中軍大將軍司隸校尉苻冲為尚

書左僕射封西平王又以左長史楊輔為右僕射右長

史王亮為護軍將軍立妃楊氏為皇后子寧為皇太子

壽為長樂王

樂音洛

鐸為平原王懿為勃海王昶為濟北

王呂光自龜茲還至宜禾

班志敦煌郡廣至縣昆侖障宜禾都尉治晉分為宜

禾縣屬晉昌郡劉昫曰瓜州常樂縣漢廣至縣魏分廣至置宜禾縣李昌於此置涼興郡隨廢置長樂鎮武德

五年改鎮為縣  
龜茲音丘慈

秦涼州刺史梁熙謀閉境拒之高昌太

守楊翰言於熙曰

李延壽曰高昌者車師前王之故地昔漢武帝遣兵西討師旅頓弊其中

尤因者住焉地勢高敞人庶昌盛因名高昌其地有漢時高昌壘晉為高昌郡後因為國名

呂光新

破西域兵彊氣銳聞中原喪亂

喪息浪翻

必有異圖河北地

方萬里帶甲十萬足以自保若光出流沙其勢難敵高

梧谷口險阻之要宜先守之而奪其水

高梧谷口當在高昌西界

彼

既窮渴可以坐制如以為遠伊吾關亦可拒也

伊吾縣晉置屬

晉昌郡有伊吾關

度此二阨雖有子房之策無所施矣

言地險既失雖

有張良之計  
無所用也

熙勿聽美水令捷為張統謂熙曰今關中

大亂京師存亡不可知

長安已陷而涼州不知  
道梗故也捷居言翻

呂光之

來其志難測將軍何以抗之熙曰憂之未知所出統曰

光智略過人今擁思歸之士乘戰勝之氣其鋒未易當

也

易以  
鼓翻

將軍世受大恩忠誠夙著立勲王室宜在今日

行唐公洛上之從弟勇冠一時

從才用翻  
冠古玩翻

為將軍計莫

若奉為盟主以收衆望推忠義以帥群豪

帥讀曰  
率下同

則光

雖至不敢有異心也資其精銳東兼毛興

毛興時  
刺河州

連王

統楊璧

王統時刺秦州楊璧時刺南秦州

合四州之衆掃兇逆寧帝室

此桓文之舉也熙又弗聽殺洛于西海

洛徙西海見一百四卷太元五

年梁熙既欲拒呂光又殺苻洛不過欲保據涼州非有扶顛持危之志也

光聞楊翰之謀懼

不敢進杜進曰梁熙文雅有餘機鑒不足終不能用翰

之謀不足憂也宜及其上下離心速進以取之光從之

進至高昌楊翰以郡迎降

熙不能用楊翰之謀翰遂降於光降戶江翻下同

至

玉門熙移檄責光擅命還師以子盾為鷹揚將軍與振

威將軍南安姚皓別駕衛翰帥衆五萬拒光於酒泉

帥讀

日燉煌太守姚靜晉昌太守李純以郡降光敦徒光報

檄涼州責熙無赴難之志

難乃旦翻

而遏歸國之衆遣彭晃

杜進姜飛為前鋒與盾戰于安彌

安彌縣自漢以來屬酒泉郡

大破

擒之於是四山胡夷皆附於光武威太守彭濟執熙以

降光殺之光入姑臧自領涼州刺史表杜進為武威太

守自餘將佐各受職位涼州郡縣皆降於光獨酒泉太

守宋皓西郡太守宋泮

晉志曰漢分張掖之日勒刪丹等縣置西郡其地當嶺要

城

守不下光攻而執之讓泮曰吾受詔平西域而梁熙絕

我歸路此朝廷之罪人卿何為附之泮曰將軍受詔平  
西域不受詔亂涼州梁公何罪而將軍殺之泮但苦力  
不足不能報君父之讐耳豈肯如逆氏彭濟之所為乎  
主滅臣死固其常也光殺泮及皓主簿尉祐姦佞傾險  
尉姓也與彭濟俱執梁熙光寵信之祐譖殺名士姚皓  
讀如字

等十餘人涼州人由是不悅

昔齊人伐燕勝之孟子曰取之而燕民悅則取之取

之而燕民不悅則勿取其後燕卒報齊呂光始得涼士而無以收涼人之心宜其有國不永也

光以祐

為金城太守祐至允吾

允吾漢縣屬金城郡晉省據水經注允吾在廣武西北其地在

當時蓋屬廣武郡界劉昫曰唐鄆州龍支縣本漢允吾縣後漢改曰龍耆後魏改曰金城又改曰龍支積石山

今在縣南允音鉛吾音牙襲據其城以叛姜飛擊破之祐奔據興城

以載記參考水經興城當在允吾之西白土之東

乞伏國仁自稱大都督大

將軍單于領秦河二州牧

單音蟬

改元建義以乙旃童泥

為左相屋引出支為右相獨孤匹蹄為左輔武群勇士

為右輔

乙旃屋引獨孤武群皆夷人複姓乞伏與拓拔同出于鮮卑故其部人亦有乙旃獨孤二姓泥

與泥

弟乾歸為上將軍分其地置武城等十二郡

載記曰置

武城武陽安固武始漢陽天水畧陽  
湫川甘松匡朋白馬苑川十二郡

築勇士城而都之

水經注苑川水出勇士縣之子城南山北逕牧師苑故漢牧苑之地也有東西二苑城其城相去七里西城即乞伏所都

秦尚書令魏昌公纂自關中奔晉陽秦主丕拜

纂太尉封東海王冬十月西燕主冲遣尚書令高盖

帥衆五萬伐後秦戰于新平南盖大敗降于後秦

帥讀曰率

降戶江翻

初盖以楊定為子及盖敗定亡奔隴右復收集其

舊衆

定為西燕禽纔六月耳復扶又翻

符定符紹符謨符亮聞秦主

丕即位皆自河北遣使謝罪

定紹謨亮降燕見上卷上年

中山太守

王兖本新平氏也固守博陵為秦拒燕

為于偽翻

十一月丕

以充為平州刺史定為冀州牧紹為冀州都督謨為幽

州牧亮為幽平二州都督並進爵郡公左將軍竇衝據

茲川

茲川即霸川也霸水古曰滋水秦穆公之霸也  
更滋水曰霸水以顯霸功今曰茲川因古名也

有

衆數萬與秦州刺史王統河州刺史毛興並州刺史王

廣南秦州刺史楊璧衛將軍楊定皆自隴右遣使邀丕

共擊後秦丕以定為雍州牧

雍于用翻

衝為梁州牧加統鎮

西大將軍興車騎大將軍璧征南大將軍並開府儀同

三司加廣安西將軍皆進位州牧楊定尋徙治歷城置

儲蓄於百頃

百頃自楊茂搜以來保為巢穴

自稱龍驤將軍仇池公遣

使來稱藩

驤思將翻使疏吏翻

詔因其所號假之其後又取天水

略陽之地自稱秦州刺史隴西王 繹幕人蔡匡據城

以叛燕

繹幕縣自漢以來屬清河郡至隋廢入德州安樂縣

燕慕容麟慕容隆共

攻之泰山太守任泰潛師救匡

任音壬

至匡壘南八里燕

人乃覺之諸將以匡未下而外敵奄至甚患之隆曰匡

恃外救故不時下今計泰之兵不過數千人及其未合

擊之泰敗匡自降矣乃釋匡擊泰大敗之斬首千餘級

匡遂降

降戶江翻下同

燕王垂殺之且屠其壘慕容農至龍

城

自蠟喻塞歷凡城至龍城

休士馬十餘日諸將皆曰殿下之來取

道甚速今至此久留不進何也農曰吾來速者恐餘巖

過山鈔盜侵擾良民耳

此山為白狼山鈔楚交翻

巖才不踰人誑誘

饑兒

誑居況翻誘音面

烏集為群非有綱紀吾已扼其喉久將

離散無能為也今此田垂熟未收而行徒自耗損當俟

收畢往則梟之

梟堅堯翻

亦不出旬日耳頃之農將步騎三

萬至令支巖衆震駭稍稍踰城歸農巖計窮出降農斬

之進擊高句麗復遼東玄菟二郡

郝景之敗高句麗陷遼東玄菟同都翻

還至龍城上䟽請繕修陵廟

燕自慕容皝以前皆葬遼西故陵廟在焉

燕王

垂以農為使持節都督幽平二州北狄諸軍事幽州牧

鎮龍城

使疏吏翻

徙平州刺史帶方王佐鎮平郭農於是創

立法制事從寬簡清刑獄省賦役勸課農桑居民富贍

四方流民前後至者數萬口先是幽冀流民多入高句

麗

先悉篇翻

農以驃騎司馬范陽龐淵為遼東太守招撫之

慕容麟攻王兗于博陵城中糧竭矢盡功曹張猗踰

城出聚衆以應麟充臨城數之曰

數所角數

卿是秦民吾是

卿君卿起兵應賊自號義兵何名實之相違也古人求

忠臣必於孝子之門

後漢韋彪之言

卿母在城棄而不顧吾何

有焉今人取卿一時之功則可矣寧能忘卿不忠不孝

之事乎不意中州禮義之邦乃有如卿者也十二月麟

拔博陵執充及苻鑑殺之昌黎太守宋敞帥烏桓索頭

之衆救充不及而還

帥讀曰率索音各翻還從宣翻又如字

秦主丕以敞

為平州刺史

敞時從王永在壺關

燕王垂北如中山謂諸將曰

樂浪王招流離實倉廩外給軍糧內營宮室雖蕭何之

功何以加之

樂浪王溫之功詳見上漢高祖與項羽相拒蕭何鎮撫關中為之根本

丙申

垂始定都中山

杜佑曰後燕都中山今博陵郡唐昌縣

秦苻定據信都

以拒燕燕王垂以從弟北地王精為冀州刺史將兵攻

之

從才用翻將即亮翻

拓跋珪從曾祖紇羅與其弟建及諸部

大人共請賀訥推珪為主

從才用翻

十一年春正月戊申拓跋珪大會于牛川

自武周塞西行至牛川牛

川以北皆大漠也據魏紀窟咄之來寇也珪乞師于燕自弩山至牛川屯於延水南出代谷以會燕師又據水

經注于延水出長川城南則長川即牛川也班志于延水出代郡且如塞外則牛川亦當在且如塞外也又明元帝大獮于牛川登釜山括地志釜山在姑州懷戎縣北三里且如之且音子如翻翼捷之嫡孫世子寔之子拓跋氏自此興矣改元登國以長孫嵩為南部大

人叔孫普洛為北部大人分治其眾

魏書曰魏初自北荒南遷置四部大

人坐王庭決辭訟以言語約束刻契記事無圖圖以上考訊之法諸犯罪者皆臨時決遣治直之翻下同

谷張袞為左長史許謙為右司馬廣寧王建代人和跋

叔孫建庾岳為外朝大人

魏書官氏志拓跋鄰命叔父之脗曰乙旃氏後改叔孫氏

朝直奚牧為治民長

兩長知

皆掌宿衛及參軍國謀議長

孫道生賀毗等待從左右

從才用翻

出納教命王建娶代王

什翼犍之女岳和辰之弟道生嵩之從子也

更和辰奉珪母賀氏

以奔珪長孫嵩帥部衆歸

燕王垂即皇帝位

垂字道明燕主

珪事並見上從才用翻

號之第五子

後秦王苻如安定

南安祕宜

祕姓也前漢書功臣表有

戴侯祕彭時祕氏為南安豪族

帥羌胡五萬餘人攻乞伏國仁國仁將

兵五千逆擊大破之

帥讀曰率將即亮翻

宜奔還南安

鮮于乞

之殺翟真也

翟真見殺見上年四月

翟遼奔黎陽黎陽太守滕恬

之甚愛信之恬之喜畋獵

喜許記翻

不愛士卒遼潛施姦惠

以收衆心恬之南攻鹿鳴城

黎陽在河北鹿鳴城在河南鄆道元曰桑竹書紀年

梁惠成王十三年取鄭鹿即是城也今城內有臺尚謂之鹿鳴臺又謂之鹿鳴城

遼于後閉門

拒之恬之東奔鄆城

鄆吉據翻

遼追執之遂據黎陽豫州刺

史朱序遣將軍秦膺童斌與淮泗諸郡共討之

斌音彬

秦益州牧王廣自隴右引兵攻河州牧毛興於枹罕興

遣建節將軍衛平帥其宗人一千七百夜襲廣大破之

帥讀曰率

二月秦州牧王統遣兵助廣攻興嬰城自守

去年

王廣自成都依統

燕大赦改元建興置公卿尚書百官繕宗

廟社稷

西燕主冲樂在長安

洛音

且畏燕主垂之彊

不敢東歸課農築室為久安之計鮮卑咸怨之

鮮卑思東歸而

冲安于長安故怨傳曰以欲從人則可以人從欲鮮濟其是之謂歟

左將軍韓延因衆心

不悅攻冲殺之立冲將段隨為燕王改元昌平初張

天錫之南奔也

見上卷太元八年

秦長水校尉王穆匿其世子

大豫與俱奔河西依禿髮思復鞬

思復鞬烏孤之父也鞬居言翻

思復

鞬送魏安

五代志武威郡昌松縣後魏置昌松郡後周廢郡以揖次縣入焉又有後魏魏安郡後亦

廢載記言焦松等迎大豫于揖次則魏安蓋後魏所置郡晉書成於唐唐史臣以後魏郡名書之耳孟康曰揖

音子如翻  
次音恣

魏安人焦松齊肅張濟等聚兵數千人迎大

豫為主攻呂光昌松郡拔之

昌松即漢倉松縣地本屬武威郡蓋河西張氏分置

郡也呂光後以郭曆言改昌松為東張掖郡

執太守王世強光使輔國將軍

杜進擊之進兵敗大豫進逼姑臧王穆諫曰光糧豐城

固甲兵精銳逼之非利不如席卷嶺西

卷讀曰捲

礪兵積粟

然後東向與之爭不及暮年光可取也大豫不從自號

撫軍將軍涼州牧改元鳳凰以王穆為長史傳檄郡縣

使穆說諭嶺西諸郡

自西郡至張掖酒泉建康晉昌其地皆嶺西也說翰尚翻

建康

太守李隰祈連都尉嚴純皆起兵應之

建康郡張駿置屬涼州新唐書

地理志甘州張掖縣西北百九十里有祁連山北有建

康軍蓋張氏置郡地也晉書地理志永興中張祚置漢

陽縣以守牧地張

立觀改為祁連縣有衆三萬保據楊塢

楊塢在姑臧城西

代

王珪徙居定襄之盛樂

按盛樂前漢書作成樂屬定襄後漢書作盛樂屬雲中疑定襄

之盛樂即雲中之盛樂也然魏書帝紀什翼犍立三年

移都于雲中之盛樂明年築盛樂城於故城南八里則

已非後漢之盛樂城疑定襄之盛樂乃前漢之成樂城

也蓋建武之初匈奴侵寇塞下之民悉內徙其後南單

于內附北單于勢屈復歸內徙之民于塞下即縣城郭

掃地更為必有非其故處者攷宋白續通典唐振武軍

漢定襄郡之盛樂也在陰山之陽黃河之北後魏所都

盛樂是也在唐朔州北三百餘里後魏孝文遷洛之後

于定襄故城置朔州領盛樂廣牧二郡唐初平突厥置  
雲中都督府于盛樂貞觀八年移雲州雲中郡及定襄  
縣于今雲州而雲中都督府後又改單于都護府又改  
安北都護府由是雲中定襄地名混亂不可考而盛樂  
則一務農息民國人悅之

史言拓跋珪所以興

三月大赦泰

山太守張願以郡叛降翟遼

降戶江翻

初謝玄欲使朱序屯

梁國玄自屯彭城以北固河上西援洛陽朝議以征役

既久欲令玄置戍而還會翟遼張願繼叛北方騷動玄

謝罪乞解職詔慰諭令還淮陰燕主垂追尊母蘭氏

為文昭皇后欲遷文明段后以蘭氏配享太祖

段氏燕王號之

元妃蘭氏銑之側室也銑廟號太祖謚文明皇帝

詔百官議之皆以為當然

順

也指博士劉詳董謚以為堯母為帝譽妃位第三不以貴

陵姜嫄

帝王紀曰帝譽有四妃元妃有郤氏女曰姜嫄生后稷次妃有娥氏女曰簡狄生高次妃陳豐

氏女曰慶都生放勳次妃姬譽氏女曰常義生摯譽告沃翻

明聖之道以至公為先

文昭后宜立別廟垂怒逼之詳謚曰上所欲為無問於

臣臣案經奉禮不敢有貳垂乃不復問諸儒卒遷段后

以蘭后代之

復扶又翻  
卒子成翻

又以景昭可足渾后傾覆社稷

追廢之尊烈祖昭儀段氏為景德皇后配享烈祖

可足  
渾氏

燕主雋之元妃也傾覆事見一百二卷海西公太和四年段氏雋之側室也雋廟號烈祖謚景昭皇帝

崔鴻曰齊桓公命諸侯無以妾為妻

孟子曰齊桓公葵丘之會初命曰誅

不孝無易樹子無以妾為妻

夫之於妻猶不可以妾代之况子而易

其母乎春秋所稱母以子貴者君母既沒得以妾母為

小君也

春秋公羊傳曰桓幼而貴隱長而卑隱長又賢諸大夫扳隱而立之隱之立為桓立也隱長又

賢何以不宜立立適以長不以賢立子以貴不以長桓何以貴母貴也母貴則子何以貴子以母貴母以子貴左氏傳曰惠公元妃孟子孟子卒繼室以聲子生隱公宋武公生仲子為魯大夫生桓公而惠公薨是以隱公立而至於享祀宗廟則成風終不得配莊公也

魯莊公夫人姜

氏成風者莊公之妾僖公之母也姜氏通于共仲我閔公而欲立共仲不克遂孫于邾齊桓公殺之僖公既立請其喪以夫

君父之所為臣子必習而效之猶形聲之

于影響也寶之逼殺其母

事見後一百八卷太元二十一年

由垂為之

漸也堯舜之讓猶為之噲之禍

事見二卷周慎靚王五年

况違禮而

縱私者乎昔文姜得罪於桓公春秋不之廢

魯桓公之夫人曰文

姜通于齊襄公桓公謫之夫人以告襄公遂殺桓公至莊公二十一年春秋書夫人姜氏薨二十二年書葬我

小君文姜是不之廢也

可足渾氏雖有罪於前朝

朝直

然小君之

禮成矣垂以私憾廢之

私憾謂諧殺垂妃段氏又諧垂而逐之奔秦也

又立兄

妾之無子者皆非禮也

劉顯自善無南走馬邑

畏代之偏且懼其修怨也

其族人奴真帥所部

請降于代

帥讀曰率降戶江翻

奴真有兄韃先居賀蘭部

韃居言翻

奴真

言於代王珪請召韃而以所部讓之珪許之韃既領部遣

弟去斤遣賀訥金馬

遣于季翻

賀染干謂去斤曰我待汝兄弟

厚汝今領部宜來從我去斤許之奴真怒曰我祖父以來世為代忠臣故我以部讓汝等欲為義也今汝等無狀乃謀叛國義於何在遂殺韃及去斤染干聞之引兵攻奴真

奴真奔代珪遣使責染干染干乃止

珪與賀蘭從此隙矣使疏更翻

西

燕僕射慕容恒尚書慕容永襲段隨殺之立宜都王子顓

為燕王

顓蓋燕宜都王栢之子顓魚豈翻

改元建明帥鮮卑男女四十餘

萬口去長安而東

海西公太和五年秦遷鮮卑于長安至是纔十七年耳而種類蕃育乃如此唐

太宗阿史那結社率之變亦幸其早發耳帥讀曰率

恒弟護軍將軍韜誘顓殺之

於臨晉

誘音酉

恒怒捨韜去永與武衛將軍刁雲帥衆攻

韜韜敗奔恒營恒立西燕主冲之子瑤為帝改元建平

謚冲曰威皇帝衆皆去瑤奔永永執瑤殺之立慕容泓

子忠為帝改元建武忠以永為太尉守尚書令封河東  
公永持法寬平鮮卑安之至聞喜聞燕主垂已稱尊號  
不敢進築燕熙城而居之

為燕主垂城  
西燕張本

鮮卑既東長

安空虛前滎陽高陵趙穀等招杏城盧水胡郝奴帥戶  
四千入於長安渭北皆應之

帥讀曰  
率下同

以穀為丞相扶風

王麟有眾數千保據馬嵬

馬嵬山在咸陽縣西去長安  
城百餘里杜佑曰京兆金城

縣有馬嵬故城孫景安征塗記云馬嵬所築不知何代  
人金城周曰犬丘秦曰廢丘漢曰槐里麟離珍翻嵬吾

回奴遣弟多攻之夏四月後秦王苒自安定伐之麟奔

漢中長執多而進奴懼請降

降戶江翻

拜鎮北將軍六谷大

都督

長安南山有六谷

癸巳以尚書僕射陸納為左僕射譙

王恬為右僕射

晉志曰左右僕射或不兩置但曰尚書僕射

納玩之子也

陸玩

見九十四卷或

毛興襲擊王廣敗之

敗稱

廣奔秦州

帝咸和四年

隴西鮮卑匹蘭執廣送于後秦興復欲攻王統于上邽

枹罕諸氏皆厭苦兵事

諸氏蓋秦王堅使毛興領之以鎮枹罕者也復扶又翻枹音膚

乃共殺興推衛平為河州刺史

以衛平宗強故推之

遣使請命於

秦

便玩更

燕主垂封其子農為遼西王麟為趙王隆

為高陽王 代王珪初改稱魏王

拓跋氏自此國號魏

張大豫

自楊塢進屯姑臧城西王穆及禿髮思復鞬子奚于帥

眾三萬屯於城南

鞬居言翻

呂光出擊大破之斬奚于等二

萬餘級 秦大赦以衛平為撫軍將軍河州刺史呂光

為車騎大將軍涼州牧

騎奇寄翻

使者皆没于後秦不能達

時秦主丕在晉陽後秦隔其道故不能達二鎮

燕主垂以范陽王德為尚書

令太原王楷為左僕射樂浪王溫為司隸校尉

溫守中山有營

宮室建都邑之功因用為司隸樂浪音洛琅

後秦王萇即皇帝位于長安

萇字景茂姚弋仲之第二十四子也

大赦改元建初國號大秦追尊其父

弋仲為景元皇帝立妻蛇氏為皇后

類篇蛇以者翻虜姓也姓譜姚萇后

蛇氏南安人也蛇食遮翻又音它

子興為皇太子置百官萇與群臣宴

酒酣言曰諸卿皆與朕北面秦朝

朝直遙翻

今忽為君臣得

無恥乎趙遷曰天不恥以陛下為子臣等何恥為臣萇

大笑魏王珪東如陵石

陵石地名在盛樂東

護佛侯部帥侯辰

乙佛部帥代題皆叛走

帥所類翻

諸將請追之珪曰侯辰等

累世服役有罪且當忍之方今國家草創人情未壹愚

者固宜前却

一前一却言叛服不常也

不足追也

史言珪能識時知變以安反側

六月庚寅以前輔國將軍楊亮為雍州刺史鎮衛山陵

帝置雍州于襄陽今遣亮帶雍州鎮洛雍于用翻

荊州刺史桓石民遣將軍晏

謙擊弘農下之

姓譜曰左傳齊有晏氏代為大夫

初置湖陝二戍

湖陝二縣

皆屬弘農陝式冉翻

西燕刁雲等殺西燕主忠推慕容永為使

持節大都督中外諸軍事大將軍大單于雍秦梁涼四

州牧錄尚書事河東王稱藩于燕

稱藩于燕主垂也使疏吏翻雍于用翻

燕主垂遣太原王楷趙王麟陳留王紹章武王宙攻

秦苻定苻紹苻謨苻亮等

去年苻定等背燕為秦

楷先以書與之

為陳禍福定等皆降

降戶江翻

垂封定等為侯曰以酬秦主

之德 秦主丕以都督中外諸軍事司徒錄尚書事王

永為左丞相太尉東海王纂為大司馬司空張蚝為太

尉

蚝七吏翻

尚書令咸陽徐義為司空司隸校尉王騰為驃

騎大將軍儀同三司

驃匹妙翻騎奇寄翻

永傳檄四方公侯牧守

壘主民豪共討姚萇慕容垂令各帥所統以孟冬上旬

會大駕于臨晉

帥讀曰率

於是天水姜延馮翊寇明河東王

昭新平張晏京兆杜敏扶風馬朗建忠將軍高平牧官

都尉扶風王敏等

建忠將軍蓋亦苻氏創置高平縣漢屬安定郡晉省前趙劉曜以為朔州

治所秦置牧官都尉於其地

咸承檄起兵各有衆數萬遣使詣秦

使疏

吏翻丕皆就拜將軍郡守封列侯冠軍將軍鄧景擁衆五

千據彭池與竇衝為首尾以擊後秦

彭池恐當作彪池彪池在長安西詩

所謂陂池北流者也竇衝據茲川在長安東南可以相為首尾又據新唐書地理志寧州有彭池但去茲川遠

耳丕以景為京兆尹景羗之子也

鄧羗秦之名將

後秦王萇

徙安定五千餘戶于長安 秋七月秦平涼太守金熙

安定都尉没奕干與後秦左將軍姚方成戰于孫丘谷

孫丘谷當在安定

方成兵敗後秦主苻以其弟征虜將軍緒為

司隸校尉鎮長安自將至安定

將即亮翻

擊熙等大破之金

熙本東胡之種

秦謂鮮卑之種居遼碣者為東胡種章勇翻

没奕干鮮卑多

蘭部帥也

帥所類翻

枹罕諸氏

枹音膚

以衛平衰老難與成功

議廢之而憚其宗彊累日不決氏啖青謂諸將曰

啖徒覽翻

姓也 大事宜時定不然變生諸君但請衛公為會觀我所

為會七夕大宴青抽劔而前曰今天下大亂吾曹休戚

同之非賢主不可以濟大事衛公老宜返初服以避賢

路

衛平本毛興部將

狄道長符登

長知兩翻

雖王室踈屬志略雄明

請共立之以赴大駕

欲承王永徽赴秦主丕也

諸君有不同者即下

異議乃奮劔攘袂將斬異已者衆皆從之莫敢仰視於

是推登為使持節都督隴右諸軍事撫軍大將軍雍河

二州牧略陽公帥衆五萬東下隴攻南安拔之馳使請

命於秦登秦主丕之族子也

符登事始此使疏吏翻雍于用翻帥讀曰率下同

祕宜與莫侯悌眷帥其衆三萬餘戶降于乞伏國仁

國仁拜宜東秦州刺史悌眷梁州刺史

莫侯夷人複姓降戶江翻下同

已酉魏王珪還盛樂

自陵石還也

代題復以部落來降

復扶

又十餘日又奔劉顯珪使其孫倍斤代領其衆劉顯弟

肺泥帥衆降魏

八月燕主垂留太子寶守中山以趙

王麟為尚書右僕射錄留臺庚午自帥范陽王德等南

畧地使高陽王隆東徇平原丁零鮮于乞保曲陽西山

曲陽縣屬常山郡

聞垂南伐出營望都

望都縣屬中山郡水經注堯封于唐堯山在東

北堯母慶都山在南登堯山見都山故望都縣以為名也

剽掠居民

剽匹奴翻

趙王麟自

出討之諸將皆曰殿下虛鎮遠征萬一無功而返虧損  
威重不如遣諸將討之麟曰乞聞大駕在外無所畏忌  
必不設備一舉可取不足憂也乃聲言至魯口夜回趣

乞

趣七  
喻翻

比明至其營掩擊擒之

比必寐  
翻及也

翟遼寇譙朱

序擊走之

秦王丕以苻登為征西大將軍開府儀同

三司南安王持節州牧都督皆因其所稱而授之又以

徐義為右丞相留王騰守晉陽右僕射楊輔成壺關帥

衆四萬進屯平陽

帥讀  
曰率

初後秦主萇之弟碩德統所

部羌居隴上聞萇起兵自稱征西將軍聚衆於冀城以  
應之以兄孫詳為安遠將軍據隴城從孫訓為安西將  
軍據南安之赤亭

諸姚本赤亭羌也

與秦秦州刺史王統相持

萇自安定引兵會碩德攻統天水屠各畧陽羌胡應之  
者二萬餘戶秦畧陽太守王皮降之

屠各直於翻降戶江翻

初秦

滅代遷代王什翼犍少子窟咄於長安

事見一百四卷太元元年窟咄告

骨翻咄當沒翻

從慕容永東徙永以窟咄為新興太守劉顯遣

其弟亢泥迎窟咄以兵隨之逼魏南境諸部騷動魏王

珪左右于桓等與部人謀執珪以應窟咄幢將代人莫

題等亦潛與窟咄交通

魏收官氏志道武登國元年置幢將六人主三郎衛士直宿禁

中者侍中已下中散已上皆統之拓拔詰汾時餘部諸姓內人者有莫那婁氏後為莫氏幢直江翻

桓舅

穆崇告之珪誅桓等五人莫題等七姓悉原不問

為後珪殺

莫題張本

珪懼內難

難乃旦翻

北踰陰山復依賀蘭部

復扶又翻

遣外

朝大人遼東安同求救於燕

姓譜安息王子入侍遂為漢人風俗通漢有安成為

太守廬山記有安息國王子安高朝直逞翻

燕主垂遣趙王麟救之

九月

王統以秦州降於後秦

降戶江翻

後秦主苻萇以姚碩德為使

持節都督隴右諸軍事秦州刺史鎮上邽

使疏  
吏翻

呂光

得秦王堅函問舉軍縞素謚曰文昭皇帝冬十月大赦

改元大安

晉書載記  
作太安

西燕慕容永遣使詣秦主丕求

假道東歸

使疏  
吏翻

丕弗許與永戰于襄陵

襄陵縣漢屬河  
東郡晉屬平陽

郡秦兵大敗左丞相王永衛大將軍俱石子皆死初東

海王纂自長安來

去年纂  
奔丕

麾下壯士三千餘人丕忌之

既敗懼為纂所殺帥騎數千南奔東垣

東垣縣漢已改  
為真定此東垣

在河南新安縣界宋白曰河南府王屋縣漢為河東郡  
垣縣地又絳州垣縣本河東郡縣名其地即周召分陝

之所又曰河南府漢為河南郡治洛陽後漢都洛陽河南屬司隸校尉魏陳留王與合河南等五郡置司州劉聰為荊州石虎為洛州苻堅為豫州宋武入洛更置東垣西垣二縣仍于虎牢置司州帥讀曰率騎奇寄翻

謀襲洛陽揚威將軍馮該自陝邀擊之

陝式冉翻

殺不執其

太子寧長樂王壽送建康

樂音洛

詔赦不誅以付苻宏

宏苻

去年來奔處之江州

纂與其弟尚書永平侯師奴帥秦眾數萬走

據杏城其餘王公百官皆沒於永永遂進據長子即皇

帝位改元中興將以秦后楊氏為上夫人楊氏引劍刺

永

刺七亦翻

為永所殺

甲申海西公奕薨于吳

年四十五

燕

寺人吳深據清河反

寺音侍又如字

燕主垂攻之不克

後秦

主萇還安定

自上邽還安定也

秦南安王登既克南安夷夏

歸之者三萬餘戶

夏戶雅翻

遂進攻姚碩德于秦州後秦主

萇自往救之登與萇戰于胡奴阜

胡奴阜在上邽西

大破之斬

首二萬餘級將軍啖青射萇中之

射而亦翻中竹仲翻

萇創重

創初

良翻

走保上邽姚碩德代之統衆

燕趙王麟軍未至魏

拓跋窟咄稍前逼魏王珪賀染干侵魏北部以應之魏

衆驚擾北部大人叔孫普洛亡奔劉衛辰麟聞之遽遣

安同等歸魏人知燕軍在近衆心少安

少詩  
名翻

窟咄進屯

高柳

高柳縣漢屬代郡晉省鄴道元曰高柳在代中其山重巒疊嶽霞舉雲高其山隱隱而東出遼塞注

又見  
前

珪引兵與麟會擊之窟咄大敗奔劉衛辰衛辰殺

之珪悉收其衆以代人庫狄干為北部大人

魏書官氏  
志次南諸

部有庫狄氏  
後為狄氏

麟引兵還中山劉衛辰居朔方士馬甚盛

後秦主苻以衛辰為大將軍大單于河西王幽州牧

單音

蟬

西秦主永以衛辰為大將軍朔州牧十一月秦尚書

寇遺奉勃海王懿濟北王昶自杏城奔南安

濟子  
禮翻

南安

王登發喪行服謚秦主丕曰哀平皇帝登議立懿為主

衆曰勃海王雖先帝之子然年在幼冲未堪多難難乃

今三虜窺覲三虜謂姚萇慕容垂慕容永也宜立長君長知非大王不

可登乃為壇於隴東即皇帝位登字文高堅之族孫也大赦改元

太初置百官慕容柔慕容盛及盛弟會皆在長子太元

九年柔等自長安得脫奔慕容冲冲死隨永東遷盛謂柔會曰主上已中興幽

冀主上謂慕容垂東西未壹東謂燕主垂西謂燕主永吾屬居嫌疑之地為

智為愚皆將不免不若以時東歸無為坐待魚肉也遂

相與亡歸燕後歲餘西燕主永悉誅燕主雋及燕主垂

之子孫男女無遺

史言慕容盛之智

張大豫自西郡入臨洮

掠民五千餘戶保據俱城

俱城在臨洮界

十二月呂光自稱

使持節侍中中外大都督督隴右河西諸軍事大將軍

涼州牧酒泉公

使疏吏翻

秦主登立世祖神主于軍中

秦主

堅廟號世祖

載以輜輶

車四面有屏蔽者曰輜輶輶蒲眠翻

建黃旗青蓋以虎

賁三千人衛之

賁音奔

凡所欲為必啟主而後行引兵五

萬東擊後秦將士皆刻鉾鎧為死休字

鉾頭年鎧甲也鉾音年言欲復

讐必死乃休也楊正衡曰字林鉞古矛字

每戰以劔稍為方圓大陣

稍色角翻與樂

同知有厚薄從中分配故人自為戰所向無前初長安

之將敗也

謂苻堅為慕容冲所困之時

中壘將軍徐嵩屯騎校尉胡

空各聚眾五千結壘自固既而受後秦官爵後秦主苻

以王禮葬秦主堅于二壘之間及登至嵩空以眾降之

登拜嵩雍州刺史空京兆尹

降戶江翻雍于用翻

改葬堅以天子

之禮乙酉燕主垂攻吳深壘拔之深單馬走

吳深時據清河

以叛燕

垂進屯聊城之逢闕陂

聊城縣漢屬東郡晉屬平原郡

初燕太子

洗馬溫詳來奔以為濟北太守屯東阿

東阿縣漢屬東郡晉屬濟北郡

洗悉薦翻  
濟子禮翻

燕主垂遣范陽王德高陽王隆攻之詳遣從

弟攀守河南岸子楷守碣磳以拒之

燕主垂以魏王

珪為西單于封上谷王珪不受

珪不受燕封其志  
不在小單音蟬

資治通鑑卷一百六